

清

史

稿

清史稿

本紀十四

高宗本紀五

四十一年春正月癸酉朔富德克打噶咱普德爾窩馬爾邦等礪卡明亮等克獨松等礪卡甲戌定郡王綿德以交結禮部司員削爵命綿恩承襲阿桂克喇烏喇等礪卡及舍齊等寺己卯阿桂率諸軍進圍噶喇依索諾木之母及其姑姊妹出降命封阿桂一等誠謀英勇公子四團龍補服金黃帶加賞果毅繼勇公豐昇額一等子封明亮一等襄勇伯海蘭察一等超勇侯額森特一等男和隆武三等果勇侯福康安普爾普三等男加賞奎林一等男豐昇額明亮海蘭察奎林和隆武仍各予雙眼花翎賞于敏中一等輕車都尉均世襲阿桂請安插降衆於綽斯甲布十二土司地方從之壬午賞阿桂紫韁甲申調明善爲科布多參贊大臣以法福里爲烏里雅蘇臺參贊大臣己丑吏部尙書協辦大學士官保以病乞休允之以阿桂爲吏部尙書協辦大學士調豐昇額爲戶部尙書福隆安爲兵部尙書以綽克托爲工部尙書庚寅嘉謨遷倉場侍郎命阿思

哈署漕運總督永貴署吏部尙書英廉署戶部尙書二月己酉授文綬四川總督調富勒渾爲湖廣總督庚戌命嗣後社稷壇祭時或值風雨於殿內致祭獨江蘇上元等三十九州縣鎮江等五衛四十年旱災額賦辛亥上謁東陵以祇謁兩陵並巡幸山東免經過州縣本年額賦十分之三甲寅上謁昭西陵孝陵孝東陵景陵詣孝賢皇后陵奠酒阿桂等奏索諾木等出降檻送京師兩金川平乙卯命永貴回禮部尙書仍兼署吏部事丙辰命圖平定金川前後五十功臣像於紫光閣命新設將軍駐雅州四川提督桂林駐金川丁巳上還京師戊午上謁泰陵命袁守侗赴四川會同阿桂查辦參贊大臣富德壬戌上謁泰陵設雲南騰越鎮總兵官丁卯上奉皇太后巡幸山東己巳免順天直隸通州等二十八州縣未完地糧倉穀庚午停湖北勘丈湖地免直隸霸州等二十一州縣未完地糧倉穀辛未減直隸軍流以下人犯罪三月丁丑免山東泰安曲阜二縣本年額賦戊寅免山東鄒平等三十九州縣衛各項民欠額賦己卯增設成都將軍以明亮爲之辛巳減山東軍流以下人犯罪壬午免山東德州等十

一州縣緩征漕米漕項癸未以薩載爲江南河道總督楊魁爲江蘇巡撫甲申
勅爾謹陛見命畢沅署陝甘總督丙戌上駐蹕泰安謁岱廟命還督撫貢物仍
嚴飭之設金川勒烏圍總兵丁亥上登泰山辛卯戶部尙書王際華卒以袁守
侗代之免四川通省上年額賦及本年夷賦有差蠲河南武陟縣四十年水災
額賦乙未上至曲阜謁孔子廟蠲安徽懷甯等三十二州縣建陽等七衛四十
年水旱額賦丙申釋奠先師孔子告平兩金川功丁酉上謁孔林調李質穎爲
廣東巡撫以閔鶚元爲安徽巡撫戊戌富德褫職逮治己亥雲南車里逃夷乃
維屏等悔罪自歸諭免死錮之庚子命戶部侍郎和坤軍機處行走辛丑上奉
皇太后自濟甯登舟夏四月癸卯以平定金川遣官祭告天地太廟社稷以英
廉兼署戶部尙書命劉埔會同陳輝祖查勘湖北沔陽州衝潰隄工甲辰予告
協辦大學士吏部尙書官保卒丁未上閱臨清州舊城辛亥命阿桂仍在軍機
處行走癸丑蠲直隸霸州等五十二州縣四十年水災額賦有差乙卯以平定
金川遣官告祭昭西陵孝陵孝東陵景陵泰陵孝賢皇后陵丙辰遣官告祭孔

子闕里壬戌遣官告祭永陵福陵昭陵甲子以阿思哈爲漕運總督素爾訥爲左都御史索琳爲理藩院尙書仍留庫倫辦事命豐昇額署理藩院尙書乙丑上送皇太后自寶稼營還京師丙寅獻金川俘馘於廟社丁卯定西將軍阿桂等凱旋戊辰上幸良鄉城南行郊勞禮賜將軍及隨征將士等宴并賞阿桂等御用鞍馬各一上還京師己巳受俘上御瀛臺親鞫俘囚索諾木等皆磔於市上御紫光閣行飲至禮賜凱旋將士及王大臣等宴賜將軍阿桂以下銀幣有差庚午斬番目布籠普占巴雅瑪朋阿庫魯等於市五月辛未朔上奉皇太后御慈甯宮上徽號曰崇慶慈宣康惠敦和裕壽純禧恭懿安祺甯豫皇太后頒詔覃恩有差戊寅富德以誣訐阿桂悖逆處斬辛巳豁山西石樓等三縣丁徭虛額銀癸未上奉皇太后敕鑾秋獵木蘭己丑上駐蹕避暑山莊六月庚子朔定文淵閣官制壬子以甘肅皋蘭等二十九州縣廳旱災命多留市米以供民食庚申黃邦霖論斬逮治前護廣西巡撫蘇爾德署按察使廣德秋七月庚申索琳以不職鍰級以伍彌泰爲理藩院尙書丁亥授巴延三山西巡撫調鄂寶

爲湖南巡撫八月丁未召瑚圖靈阿以巴林王巴圖爲定邊左副將軍以額駙
拉旺多爾濟爲伊犁參贊大臣乙卯上幸木蘭行圍九月丙子上回駐避暑山
莊庚辰上送皇太后回鑾庚寅上奉皇太后還京師冬十月己亥朔命豐昇額
爲步軍統領福隆安仍兼管壬寅綏遠城將軍容保罷以伍彌泰代之甲辰命
英誠公阿克棟阿在領侍衛內大臣上行走以奎林爲理藩院尙書戊申左都
御史張若澐病免辛亥調崔應階爲左都御史以余文儀爲刑部尙書壬子阿
思哈病免以鄂寶爲漕運總督癸丑以敦福爲湖南巡撫丙辰命三寶查浙江
漕糧積弊甲子以甘肅臬蘭等二十九廳州縣旱災豁歷年積欠倉糧四百萬
有奇十一月甲申命四庫全書館詳覈違禁各書分別改燬諭曰明季諸人書
集詞意抵觸本朝者如錢謙益等均不能死節妄肆狂悖自應查明燬棄劉宗
周黃道周立朝守正熊廷弼材優幹濟諸人所言若當時採用敗亡未必若彼
其速惟當改易字句無庸銷燬又直臣如楊漣等卽有一二語傷觸亦止須酌
改實不忍並從焚棄十二月庚子命戊戌年八月舉行繙譯鄉試次年三月舉

行會試丙午命明亮軍機處行走伍彌泰遼西安將軍博成署綏遠城將軍戊申以雅朗阿爲綏遠城將軍甲寅錫山東德州等三十州縣衛所本年被災額賦丙辰編目得魯蘊請送還內地官人准其入貢諭令進京乞恩戊午上幸瀛臺庫車阿奇木伯克哈薩克使人及四川明正土司等瞻覲各賜冠服有差

四十二年春正月戊辰朔錫甘肅乾隆二十三年至三十五年民欠銀八十四萬兩有奇丙子上御閱武樓閱兵命諸王大臣外藩蒙古及回部庫車哈薩克使臣金川土司等從觀辛巳以皇太后不豫詣長春仙館問安奉皇太后幸同樂園侍晚膳自是每日詣長春仙館請安乙酉以圖思德奏緬番內附命阿桂往雲南籌辦調李侍堯爲雲貴總督以楊景素爲兩廣總督郝碩爲山東巡撫圖思德回貴州巡撫裴宗錫回雲南巡撫己丑宥熊學鵬罪蘇爾德廣德諭斬庚寅皇太后崩奉安於慈甯宮正殿上以含清齋爲倚廬頒大行皇太后遺詔諭穿孝百日王大臣官員等二十七日除服辛卯尊大行皇太后諡號爲孝聖憲皇后推恩普免錢糧一次壬辰定二十七月內郊廟社稷遣官致祭用樂之

制乙未尊大行皇太后諡曰泰東陵丙申移大行皇太后梓宮於暢春園奉安於九經三事殿上居圓明園二月丁酉朔上詣安佑宮行告哀禮上居無逸齋苦次己亥上還居圓明園庚子上詣九經三事殿大行皇太后梓宮前供奠諸王大臣請問一二日行禮不允甲辰諭二十七日內停止元旦朝賀其百日後尋常御殿視朝屆日請旨乙巳定百日內與二十七月內御川服色及臣下服色制甲寅高晉會同阿揚阿赴安徽查案楊魁兼署兩江總督劉安徽宿州等八州縣鳳陽等三衛四十一年水災額賦丁巳上詣九經三事殿大行皇太后梓宮前行月祭禮以顏希深爲湖南巡撫三月辛未左都御史素爾訥大理寺卿尹嘉銓休致壬申以薩載赴京命德保兼署江南河道總督戊寅以邁拉遜爲左都御史壬午上大行皇太后尊諡曰孝聖慈宣康惠敦和敬天光聖憲皇后戊子以恆山保爲烏里雅蘇臺參贊大臣夏四月戊戌以緬番投誠反覆召阿桂回京留緬目所遣孟幹等戊申上詣九經三事殿孝聖憲皇后梓宮前行祖奠禮己酉孝聖憲皇后發引上送往泰東陵免經過州縣本年額賦十分之

七癸丑上謁泰陵是日孝聖憲皇后梓宮至泰東陵奉安於隆恩殿丙辰上詣泰東陵孝聖憲皇后梓宮前行百日祭禮丁巳大學士舒赫德卒戊午命永貴署大學士兼吏部尙書辛酉蠲安徽宿州等八州縣長河等三衛四十一年水災額賦壬戌命福隆安兼署吏部尙書甲子上還京師五月乙丑朔孝聖憲皇后神牌升祔太廟翌日頒詔覃恩有差戊辰上臨舒赫德喪次賜奠壬申蠲直隸清苑等十州縣逋賦戊寅以普蠲全國錢糧免福建臺灣府屬官莊租息十分之三甲申馬蘭鎮總兵滿斗於東陵掘牆通路論斬丁亥命阿桂爲武英殿大學士兼管吏部事英廉協辦大學士命尙書果毅繼勇公豐昇額之父阿里袞原襲果毅公爵號亦加繼勇二字調永貴爲吏部尙書以富勒渾爲禮部尙書三寶爲湖廣總督王亶望爲浙江巡撫蠲順天直隸大興等三十三廳州縣被災額賦六月乙卯以吉林將軍富椿調杭州將軍命福康安代之己未上詣黑龍潭祈雨秋七月蠲甘肅皋蘭等二十九廳州縣四十一年被災額賦丙戌命甘肅應征各屬番糧草束免十分之三暹羅頭目鄭昭進貢送所獲緬番諭

楊景素以請封檄諭之八月庚子免烏魯木齊各州縣戶民額糧十分之三庚申命侍郎金簡赴吉林會同福康安查辦事件九月丙子上謁泰陵泰東陵壬午上還京師冬十月戊戌戶部尙書果毅繼勇公豐昇額卒調英廉爲戶部尙書仍兼管刑部命德福爲刑部尙書乙巳詔陝西民屯租糧草束屆輸免錢糧之年一體蠲免庚申設密雲副都統一駐防兵二千辛酉命袁守侗赴浙江查審歸安縣知縣劉均被控案命侍郎周煌阿揚阿赴四川查審大足縣知縣趙憲高被控案十一月丙寅廣德處斬戊辰海成以縱庇王錫侯褫職以郝碩爲江西巡撫國泰爲山東巡撫壬申刑部尙書余文儀乞休允之甲戌調袁守侗爲刑部尙書梁國治爲戶部尙書乙酉蠲甘肅甯夏等七廳縣本年被災額賦二月丁酉蠲甘肅皋蘭等十七州縣四十一年被災額賦癸丑賑甘肅皋蘭等三十二廳州縣被旱災民

四十三年春正月壬戌朔免朝賀癸亥以鄭大進爲河南巡撫辛未追復睿親王封爵及豫親王多鐸禮親王代善鄭親王濟爾哈朗肅親王豪格克勤郡王

岳託原爵並配享太廟己卯上謁西陵免經過地方本年額賦十分之三癸未
上謁泰陵泰東陵甲申上謁泰東陵行期年禮二月丁酉朝鮮琉球入貢己酉
以特成額爲禮部尙書調綽克托爲吏部尙書富勒渾爲工部尙書特成額遷
成都將軍以鍾音爲禮部尙書調楊景素爲閩浙總督桂林爲兩廣總督李質
穎護之戊午以誠親王弘暢爲正白旗領侍衛內大臣三月甲子上詣西陵戊
辰上謁泰陵泰東陵己巳上親祭泰東陵乙亥上閱健銳營兵己丑以李湖爲
湖南巡撫夏四月辛卯以河南旱命減開封等五府軍流以下罪壬寅命先免
河南四十五年田賦癸卯肅親王蘊著卒乙巳上詣黑龍潭祈雨辛亥命減河
南軍流以下罪乙卯賜戴衛亨等一百五十七人進士及第出身有差五月庚
申朔以山東荒歉命預免四十五年錢糧丁卯命山西巡撫兼理河東鹽政戊
辰怡親王弘曉卒六月乙未以九江關監督全德浮收逮治之閏六月癸亥河
南祥符河決秋七月癸巳河南儀封考城河決乙未命袁守侗往河南會同河
督姚立德巡撫鄭大進查辦河工戊戌命高晉督辦隄工丁未上詣盛京謁陵

免經過直隸奉天各州縣本年額賦十分之三八月癸酉以儀封決河下注安徽鳳陽各州縣諭薩載等賑災民甲戌上謁永陵乙亥行大饗禮己卯上謁福陵免奉天所屬府州縣明年丁賦庚辰行大饗禮上謁昭陵辛巳行大饗禮命奉天吉林黑龍江各屬已結未結死罪均減等軍流以下悉宥之癸未上臨奠克勤郡王岳託墓甲申上臨奠武勳王揚古利宏毅公額亦都直義公費英東墓乙酉上詣文廟行禮九月甲午錦縣生員金從善以上言建儲立后納諫施德忤旨論斬戊戌禮部尙書鍾音卒金從善以妄肆詆斥處斬己亥以德保爲禮部尙書丁未申諭立儲流弊及宣明歸政之期壬子上還京師甲寅高樸以婪職論斬綽克托以失察高樸褫職命永貴爲吏部尙書乙卯命邁拉遜署吏部尙書冬十月己未以庚子年七旬萬壽巡幸江浙命舉恩科鄉會試並普蠲錢糧甲戌江蘇布政使陶易以徇縱徐述夔褫職論斬丙子免甘肅臬蘭等三十二廳州縣四十二年旱災額賦十一月戊子禁貢獻整玉如意及大玉壬辰定驛務歸巡道分管裁甘肅驛傳道賑廣西興安等九州縣本年旱災庚子免

甘肅寧下等七廳州縣四十二年被災額賦十二月庚申河南儀封隄工塌壞
高晉等下部嚴議內寅諭國泰嚴治山東冠縣義和拳教匪甲戌賑安徽當塗
等三十四州縣衛本年水旱災湖南湘陰等十五州縣衛旱災並額賦有差
四十四年春正月丙戌朔調陳輝祖爲河南巡撫鄭大進爲湖北巡撫乙未大
學士兩江總督高晉卒命三寶爲東閣大學士仍留湖廣總督任薩載爲兩江
總督李奉翰爲江南河道總督癸卯上詣西陵免經過地方本年丁賦十分之
三裁福州副都統乙巳命阿桂赴河南查勘河工丁未上謁秦陵秦東陵辛亥
上還京師二月癸亥左都御史邁拉遜病免丙子以增福爲福建巡撫申保爲
左都御史庚辰命輯明季諸臣奏疏諭曰各省送到違礙應燬書籍如徐必達
南州草薶近高疏草宋一韓掖垣封事切中彼時弊病者俱無慚骨鯁雖其君
置若罔聞而一時廢弛奢亂之迹痛切敷陳足資考鏡朕以爲不若擇其較有
關係者別加編錄名爲明季奏疏勒成一書永爲殷鑒諸臣在勝國言事於我
國家間有干犯之語不宜深責應量爲改易選錄餘仍分別撤燬壬午建江南

龍泉莊等處行宮三月丙申命英廉署直隸總督丁酉命德福署協辦大學士
調楊景素爲直隸總督三寶爲閩浙總督以圖思德爲湖廣總督舒常爲貴州
巡撫乙巳以譚尙忠署山西巡撫己酉賑湖北江夏等三十九州縣衛上年旱
災夏四月己未改闢展辦事大臣爲吐魯番領隊大臣戊辰上詣西陵壬申上
謁泰陵泰東陵丁丑改甘肅驛傳道爲分巡蘭州道戊寅以袁守侗爲河東河
道總督胡季堂爲刑部尙書己卯上閱健銳營兵庚辰上還京師五月乙未上
秋獵木蘭免經過地方本年丁賦十分之三丙申以李世傑爲廣西巡撫辛丑
上駐避暑山莊丙午以富綱爲福建巡撫丁未上詣文廟行釋奠禮六月丁卯
免甘肅乾隆二十七年至三十七年逋賦銀二十三萬五千兩糧一百零五萬
石各有奇戊辰河南武陟河內沁河決庚辰建吐魯番滿城秋七月乙未以係
士毅爲雲南巡撫八月戊辰上幸木蘭行圍辛未命和珅在御前大臣上學習
行走甲戌以宗室永璋爲黑龍江將軍乙亥寧壽宮成九月庚子上還京師冬
十月壬戌免陝西延安等三府州屬乾隆二十年至三十七年民欠社倉穀免

西藏那克舒三十九族番子等應交馬銀乙亥免甘肅莊浪等十七廳州縣被災額賦十一月甲申免安徽亳州等十一州縣額賦戊戌杭州將軍嵩椿坐耽於逸樂視職仍通諭申儆癸卯賑甘肅皋蘭等十二廳州縣災民並蠲本年額賦丙午以姚成烈爲廣西巡撫以伍彌泰護送班禪至熱河給欽差大臣關防十二月癸丑命侍郎德成至河南會辦河工甲寅命戶部侍郎董誥在軍機處行走乙卯兩廣總督桂林卒以巴延三代之雅德爲山西巡撫戊午大學士于敏中卒湖廣總督圖思德卒以富勒渾代之綽克托代爲工部尙書丙寅賑湖北沔陽等七州縣衛本年水災己巳命程景伊爲文淵閣大學士調嵇璜爲吏部尙書協辦大學士周煌爲工部尙書辛未直隸總督楊景素卒以袁守侗代之調陳輝祖爲河東河道總督榮柱爲河南巡撫

四十五年春正月庚辰朔以八月七旬萬壽頒詔覃恩有差辛巳免河南儀封等十三州縣被災額賦辛卯上巡幸江浙免直隸山東經過地方本年額賦十分之三壬辰免直隸順德等四府屬通賦己亥免山東厯城等二十八州縣逋

賦及倉穀己酉朝鮮國王李祘表賀萬壽優詔答之修浙江仁和海甯塘工二月癸丑命舒常同和珅喀爾阿查辦海甯劾李侍堯各款甲寅免江南浙江經過地方本年額賦十分之三免兩江所屬四十三年以前逋賦丙辰調李奉翰爲河東河道總督陳輝祖爲江南河道總督丁巳免臺灣府屬本年額穀免兩淮鹽戶災欠及川餉未繳銀己未上渡江閱清口東壩隄工甲子免江南浙江省會附郭諸州縣本年額賦戊辰上幸焦山壬申上幸蘇州府儀封決口合龍己卯免浙江仁和等縣逋賦三月辛巳上幸海甯州觀潮壬午上幸尖山召索諾木策凌來京以奎林爲烏魯木齊都統癸未上幸杭州府甲申上幸秋濤宮閱水師以博清額爲理藩院尙書壬辰調李質穎爲浙江巡撫李湖爲廣東巡撫以劉墉爲湖南巡撫以京察屆期予阿桂等議叙左都御史崔應階等原品休致癸巳以羅源漢爲左都御史丁酉李侍堯褫職逮問孫士毅褫職發伊犁効力以福康安爲雲貴總督索諾木策凌爲盛京將軍辛丑命英廉爲東閣大學士和珅爲戶部尙書丙午上詣明太祖陵奠酒夏四月己酉朔上渡江壬子

山東壽光人魏塾以著書忤妄處斬丁巳上至武家墩閱高家堰堤工渡河免山西太原等十六府州並歸化城等廳應徵額賦十分之三大同朔平及和林格爾等屬全免之辛酉調楊魁爲陝西巡撫劉秉恬署雲南巡撫顏希深爲貴州巡撫吳壇爲江蘇巡撫丁卯調楊魁爲河南巡撫雅德爲陝西巡撫喀爾阿爲山西巡撫五月甲申以大學士九卿改和珅所擬李侍堯監候爲斬決諭各督撫各抒所見定擬題奏丁亥上還京師癸巳賜汪如洋等一百五十五人進士及第出身有差丁酉宥孫士毅罪己亥上秋獵木蘭乙巳上駐蹕避暑山莊甲寅免湖北沔陽等五州縣本年水災額賦乙卯召大學士三寶入閣辦事調富勒渾爲閩浙總督舒常爲湖廣總督丁卯以和珅爲正白旗領侍衛內大臣庚午江蘇睢甯郭家渡河決秋七月丁丑起孫士毅爲編修丁酉班禪額爾德尼自後藏入覲上御清曠殿賜坐賜茶戊戌順天良鄉永定河決庚子上御萬樹園賜班禪額爾德尼及王公大臣蒙古王貝勒貝子公額駙台吉等宴並賜冠服金幣有差辛丑山東曹縣及河南考城河決壬寅以李本爲貴州巡撫八

月戊申賑河南寧陵等四縣水災乙卯大學士程景伊卒丁巳永定河決口合龍湖北巡撫鄭大進貢金器不納切責之己未上七旬萬壽節御潛泊敬誠殿王公大臣及蒙古王貝勒貝子額駙台吉等行慶賀禮癸酉調閔鶚元爲江蘇巡撫農起爲安徽巡撫甲戌上詣東西陵免經過地方本年額賦十分之三賑浙江諸暨等七縣水災九月以嵇璜爲文淵閣大學士蔡新爲吏部尙書協辦大學士調周煌爲兵部尙書以周元理爲工部尙書壬午上謁昭西陵孝陵孝東陵景陵詣孝賢皇后陵奠酒辛卯上謁泰陵泰東陵睢甯郭家渡決口合龍乙未上還京師乙巳賑吉林琿春水災冬十月戊申定李侍堯斬監侯調雅德爲河南巡撫辛酉免河南儀封等六縣本年水災額賦壬戌免直隸霸州等六十三州縣本年水災額賦免江蘇清河等八州縣衛本年水旱額賦免甘肅皋蘭等三十五廳州縣四十四年水災額賦甲戌命博清額署左都御史和珅仍兼署理藩院尙書十一月庚辰命博清額爲欽差大臣護送班禪額爾德尼往穆魯烏蘇地方壬午以慶桂爲烏里雅蘇台將軍癸未班禪額爾德尼卒於京

師十二月乙卯賑甘肅皋蘭等十八廳州縣饑民庚申以會同四譯館屋壞壓斃朝鮮人禮部尙書等下部嚴議丁卯命阿桂會同陳輝祖富勒渾李質穎勘視海塘

四十六年春正月己卯定蒙古喀爾喀青海杜爾伯特土爾扈特和碩特回部王公札薩克台吉等世襲爵秩丙申朝鮮國王李祘表謝賜緞匹仍貢方物溫諭受之癸卯召富勒渾李質穎來京以陳輝祖爲閩浙總督兼管浙江巡撫督辦塘工調李奉翰爲江南河道總督韓鐸爲河東河道總督二月丙辰免浙江諸暨水災額賦癸亥命阿桂勘視江南河南河工乙丑上西巡五臺山免經過地方本年額賦十分之三丙寅免順天保定七府州縣逋賦己巳調雅德爲山西巡撫庚午以富勒渾爲河南巡撫王燧論絞三月甲戌朔上幸正定府閱兵乙亥免安徽亳州等九州縣鳳陽等三衛水災額賦有差丙子免江蘇清河等八州縣衛水災額賦有差戊寅召慶桂來京以巴圖署烏里雅蘇台將軍辛巳上駐蹕五臺山己丑免甘肅皋蘭等十五廳州縣雹災額賦有差甲午以宗室

嵩椿爲綏遠城將軍庚子上還京師壬寅甘肅循化廳撒拉爾回匪蘇四十三等作亂陷河州命西安提督馬彪同勒爾謹勦之癸卯回匪犯蘭州命阿桂往甘肅調度剿賊機宜夏四月甲申朔命尙書和珅額駙拉旺多爾濟領侍衛內大臣海蘭察並巴圖魯侍衛等赴甘肅剿賊乙巳命安徽巡撫農起往甘肅辦理軍需宥李侍堯罪賞三品頂戴赴甘肅己酉甘肅官軍收復河州仁和縣進援省城庚申休致大理寺卿尹嘉銓坐妄請其父從祀孔廟及著書狂悖處絞免直隸朔州等五十廳州縣水災額賦戊辰賜錢榮等一百六十九人進士及第出身有差庚午逮勒爾謹以李侍堯管理陝甘總督事未至以阿桂兼管之召和珅回京辛未免安徽壽州等十二州縣衛河南儀封等五縣水災額賦五月辛卯諭阿桂等除回民新教閏五月癸卯朔勒爾謹論斬己酉免江蘇阜甯等七縣衛通賦庚戌上秋獵木蘭丙辰上駐蹕避暑山莊六月庚辰江蘇睢甯魏家莊河決己丑以甘肅累年冒賑命刑部嚴鞫勒爾謹逮王賈望至都壬辰免陝西西安等十二府州民欠倉穀癸巳甘肅回匪蘇四十三等伏誅秋七月

壬寅朔江蘇崇明太倉等州縣海溢甘肅布政使王廷贊以冒賑浮銷褫職逮
治丙午以奎林爲烏里雅蘇台將軍明亮爲烏魯木齊都統己酉河南萬錦灘
及儀封曲家樓河決庚申暹羅國長鄭昭遣使齎表貢方物辛酉命阿桂閱視
河南山東河工乙丑南掌國王弟召翁貢方物庚午王亶望處斬賜勒爾謹自
盡王廷贊論絞免江蘇崇明縣本年額賦賑江蘇崇明等九廳州縣河南儀封
縣水災八月甲戌賑甘肅隴西等四縣水災免金縣等七縣額征半賦己卯袁
守侗等坐查監糧失實下部嚴議壬午調福康安爲四川總督以富綱爲雲貴
總督楊魁署福建巡撫乙酉賑湖北潛江等四州縣水災丙戌上幸木蘭行圍
魏家莊決口合龍九月戊申王廷贊處絞丁卯賑山東金鄉水災冬十月丙子
賑江蘇銅山等縣水災丁丑賑山東鄒平等二十九州縣濟甯等三衛永阜等
三場水災乙酉賑直隸滄州等四州縣嚴鎮等四場水災戊子賑河南祥符十
三縣水災庚寅賑湖北江夏等十七州縣水旱災癸巳賑安徽靈璧等二十四
州縣衛水旱災丁酉上以御史劉天成奏諭曰均田之法勢必致貧者未富富

者先貧我君臣惟崇儉尙樸知愧知懼使四民則倣而已罷陝西貢皮十一月
庚子工部尙書周元理予告以羅源漢代之以劉塘爲左都御史仍暫管湖南
巡撫丙午以李世傑爲湖南巡撫戊辰以鄭大進爲直隸總督十二月己巳朔
調姚成烈爲湖北巡撫以朱椿爲廣西巡撫丁丑以雅德爲廣東巡撫譚尙忠
爲山西巡撫戊子大學士等議駁嵇璜請復黃河故道上驛之庚寅畢沅以御
史錢澧劾降三品頂戴留任辛卯調農起爲山西巡撫譚尙忠爲安徽巡撫
四十七年春正月庚子陳輝祖閔鶚元降三品頂戴留任乙卯建盛京文溯閣
丙寅四庫全書成二月己巳上御文淵閣賜四庫全書總裁等官宴賞賚有差
丁亥命乾清門侍衛鄂彌達探河源三月庚子上幸盤山壬寅上駐蹕盤山癸
丑調雅德爲福建巡撫以尙安爲廣東巡撫甲寅上還京師乙卯免甘肅積年
逋賦糧二百四十五萬石銀三十萬兩各有奇戊午免江蘇常熟等二十八廳
州縣衛水災額賦癸亥免直隸天津等三十九州縣廳水災額賦夏四月戊辰
命和珅劉塘同御史錢澧查辦山東虧空戊寅免山東壽光等五縣水災額賦

己卯山東巡撫國泰視職逮問以明興代之辛巳上閱火器營兵甲申免山西永濟縣水災額賦丁亥上閱健銳營兵壬辰協辦大學士吏部尙書蔡新乞假允之以劉墉署吏部尙書甲午羅源漢罷以劉墉爲工部尙書王杰爲都察院左都御史慶桂爲盛京將軍五月丁酉召阿桂來京命韓鍾富勒渾籌辦河工己亥賑山東曹州兗州濟甯等府州江蘇徐州豐沛等縣水災辛丑免河南祥符等六縣水災額賦定新建巴爾噶遜城名曰嘉德戊申上幸木蘭庚戌免安徽懷甯等十八州縣安慶等五衛水災額賦甲寅上駐蹕避暑山莊六月丙子國泰于易簡論斬以富躬爲安徽巡撫秋七月丙申朔命阿桂仍督辦河工戊戌索諾木策凌論斬癸卯國泰于易簡賜自盡甲辰以李侍堯國泰所辦貢物爲優皆致罪戾諭督撫惟當潔清自矢毋專以進獻爲能己未以何裕城署河東河道總督癸亥免甘肅隴西等四縣四十六年水災額賦八月丁卯以福康安爲御前大臣辛未癸酉以宗室永璋爲吉林將軍宗室恒秀爲黑龍江將軍甲戌加英廉嵒璜和珅李侍堯福康安太子太保梁國治鄭大進太子少傅薩

載太子少保壬午賑江蘇沛縣等州縣山東鄒嶧二縣被水災民癸未上幸木蘭行圍乙酉賜索諾木策凌自盡壬辰賑山東兗州等府縣被水災民九月丙申建浙江文瀾閣壬寅上回駐避暑山莊癸卯刑部尙書德福卒以喀爾阿代之命英廉暫管刑部乙巳調宗室永璋爲盛京將軍慶桂爲吉林將軍辛亥陳輝祖視職逮問調富勒渾爲閩浙總督福長安署之調李世傑爲河南巡撫以查禮爲湖南巡撫己未賑浙江玉環等處海溢災民辛酉免奉天承德等五廳縣水災額賦冬十月癸酉新建庫爾喀喇烏蘇城名曰慶綏晶河城名曰安阜丁卯賑河南汝陽等十六縣水災甲申直隸總督鄭大進卒以袁守侗署之以福崧爲浙江巡撫賑安徽壽州等十六州縣衡水旱災十二月癸亥朔陳輝祖及國棟等論斬甲申常清遷杭州將軍以烏爾圖納遜爲察哈爾都統

四十八年春正月甲午以伊星阿爲湖南巡撫戊申以薩載爲兩江總督畢沅爲陝西巡撫劉秉恬爲雲南巡撫二月甲子賜陳輝祖自盡王燧處斬乙丑以毓奇爲漕運總督丙寅以拉旺多爾濟爲御前大臣戊辰命建辟雍於太學辛

未上詣西陵免經過地方額賦十分之三乙亥上詣泰陵泰東陵戊子賜明遊東經略熊廷弼五世孫先爲儒學訓導三月辛丑予大學士阿桂等議叙禮部侍郎錢載等原品休致予總督袁守侗等巡撫農起等議叙召朱椿來京以劉義爲廣西巡撫甲寅免江蘇銅山等十九州縣淮安等三衛水旱災額賦夏四月乙丑御前大臣喀喇沁郡王札拉豐阿卒以拉旺多爾濟爲御前大臣乙亥上閱火器營兵辛巳召福康安來京五月壬辰以福康安爲正黃旗領侍衛內大臣予李奉翰兵部尙書右都御史銜甲辰以朱椿爲左都御史丙午協辦大學士吏部尙書永貴卒免安徽壽州等十一州縣上年水災額賦丁未直隸總督袁守侗卒以劉義代之以孫士毅爲廣西巡撫伍彌泰爲吏部尙書協辦大學士己酉上有疾命永塔代祀方澤癸丑上幸木蘭庚申上駐蹕避暑山莊六月乙丑體仁閣火乙酉免山東永阜等五場上年水災額賦丁亥賑湖北廣濟等六州縣水災秋七月戊戌命海祿署伊犁將軍圖思義署烏魯木齊都統乙卯命蔡新爲文華殿大學士梁國治協辦大學士劉墉爲吏部尙書八月甲午

賜達賴喇嘛玉冊玉寶甲戌明亮巴林泰等觀戰逮問以海祿爲烏魯
統乙亥上自避暑山莊詣盛京謁陵免經過地方本年額賦十分之五庚辰太
子太保大學士英廉卒辛巳上駐蹕哈那達大營喀喇沁郡王喇特納錫第等
迎駕賞賚有差丁亥上駐五里屯大營科爾沁親王恭喇布坦巴林郡王巴圖
等迎駕賞賚有差戊子予明遼東經略袁崇煥五世孫炳以八九品官選補九
月己丑朔上駐蹕四堡子東大營閱射命皇十一子永理等迎冊寶至盛京藏
於太廟癸巳上駐老邊大營閱射朝鮮國王遣使貢方物乙未免奉天各屬乾
隆四十九年額賦戊戌上謁永陵己亥行大饗禮閱興京城免盛京戶部各莊
頭倉糧免盛京等處旗地應納米豆草束十分之五減奉天等處死罪免
以下罪癸卯上謁福陵甲辰行大饗禮上謁昭陵臨奠武勳王揚古利墓乙巳
行大饗禮丙午上臨奠克勤郡王岳託墓丁未上臨奠宏毅公額亦都直義公
費英東墓戊申上御崇政殿受慶賀御大政殿賜扈從皇子王公大臣等宴賞
賚有差己酉上詣清寧宮祭神賜皇子王公大臣等食胙庚戌上回蹕戊午申

諭詹事府備詞臣陞轉之階及建儲之必不可行冬十月壬戌賑陝西榆林八州縣等旱災癸亥上駐蹕文殊菴行宮壬申上謁昭西陵孝陵孝東陵景陵乙亥上還京師十一月己亥釋國棟庚子以福隆安病未痊命福康安協同辦理兵部尙書辛丑命劉綏飭玉田附近州縣掘蝗蛹壬寅命劉綏查辦南宮縣義和拳邪教己酉以阿克棟阿爲烏里雅蘇臺參贊大臣那爾瑚善爲塔爾巴哈台參贊大臣十二月丙寅命福康安赴廣東會同永德讞鹽商獄

四十九年春正月丁未上南巡免直隸山東經過地方本年錢糧十分之三戊申免直隸順天等十二府州屬通賦甲寅調孫士毅爲廣東巡撫以吳垣爲廣西巡撫丙辰免山東利津等二十一州縣衛通賦召巴延三來京調舒常爲兩廣總督以特成額爲湖廣總督保壽爲成都將軍二月壬戌上幸泰安府詣岱廟行禮丙寅上謁少昊陵至曲阜謁先師廟丁卯釋奠先師詣孔林酌酒祭元聖周公廟壬申免江寧蘇州安徽各屬通賦免江南浙江經過地方本年錢糧十分之三以永保爲貴州巡撫賚江南浙江耆民戊寅祭河神上渡河減江蘇

安徽浙江三省軍流以下罪壬午免江南江甯蘇州浙江杭州等附郭諸縣額賦甲申免兩淮鹽戶四十五六兩年通賦三月丙戌朔祭江神上渡江幸金山丁亥上幸焦山調周煌爲左都御史己丑以王杰爲兵部尙書俟服闋後供職辛卯上幸蘇州府壬辰免湖北江夏等二十四州縣衛三十年至四十四年通賦乙未上詣文廟行禮丁酉再免浙江杭州嘉興湖州三府屬額賦十分之三己亥上幸海甯州祭海神以福建欽賜進士郭鍾岳年屆一百四歲來浙迎鑾賞國子監司業庚子上幸尖山觀潮閱視塘工辛丑上幸杭州府癸卯上詣聖因寺祭聖祖神御戊申上閱福建水師庚戌上自杭州回鑾改慶桂爲福州將軍以都爾嘉爲吉林將軍增西安副都統一甲寅上駐蹕蘇州府巴延三視職閏三月丙辰朔兵部尙書福隆安卒以福康安爲兵部尙書復興署工部尙書壬戌上幸江甯府甲子祭明太祖陵乙丑上閱江甯府駐防兵戊辰上渡江丙子上祭河神渡河以伊齡阿爲總管內務府大臣是月免江蘇上元等八州縣衛安徽懷甯等十州縣安慶等三衛上年水旱災額賦夏四月丙戌免直隸宛

平等五州縣上年水災額賦庚寅上祭禹廟壬寅以李綬爲江西巡撫甲辰以河南衛輝等屬早免汲縣等十六縣逋賦乙巳免直隸大名等七州縣逋賦丙午甘肅新教回人田五等作亂命李侍堯剛塔剿之丁未上還京師以海祿爲烏什參贊大臣庚戌免陝西甘肅三十八年至四十六年逋賦辛亥調李綬爲湖南巡撫以伊星阿爲江西巡撫甲寅賜茹綦等一百十二人進士及第出身有差是月免湖北黃梅等四縣武昌等三衛上年水災額賦五月丙辰綽克托以緣事褫職逮問以慶桂爲工部尙書調常青爲福州將軍以永鐸爲杭州將軍己未命慶桂在軍機處行走壬戌上秋獵木蘭癸亥免陝西延安等三府州逋賦戊辰上駐蹕避暑山莊己巳命福康安海蘭察赴甘肅勦捕回匪甲戌命阿桂領火器健銳兩營兵往甘肅勦叛回以阿桂爲將軍福康安海蘭察伍岱並爲參贊大臣乙亥甘肅回匪陷通渭縣尋復之以舒亮爲領隊大臣庚辰李侍堯坐玩誤褫職以福康安爲陝甘總督剛塔以失機褫職逮問辛巳調慶桂爲兵部尙書復興爲工部尙書以阿揚阿爲左都御史癸未江南巡撫郝碩坐

貪婪逮問是月免山東兗州等三府州屬上年水災額賦六月庚寅免甘肅本年額賦甲午賑湖南茶陵攸縣水災壬寅東閣大學士三寶卒戊申以書麟爲安徽巡撫是月免安徽懷甯等十三州縣衛上年水旱額賦秋七月甲寅朔日食丁巳禮部尙書曹秀先卒以姚成烈爲禮部尙書調李綬爲湖北巡撫以陸燿爲湖南巡撫己未賜郝碩自裁甲子甘肅石峯堡回匪平俘賊首張文慶等予阿桂輕車都尉晉封福康安嘉勇侯擢海蘭察子安祿二等侍衛授伍岱都統俱給騎都尉和珅再給輕車都尉餘各甄叙有差丙寅以常青爲烏魯木齊都統癸酉以伍彌泰爲東閣大學士調和珅爲吏部尙書協辦大學士兼管戶部以福康安爲戶部尙書仍留陝甘總督任戊寅命頒行軍紀律癸未李侍堯論斬宥剛塔罪戊伊犂是月免陝西榆林等八州縣上年旱災額賦八月己丑河南睢州河決命阿桂督治之癸巳免甘肅積年逋賦銀三十五萬兩糧四十七萬石各有差乙未以河南偃師縣任天篤九世同居賜御製詩御書扁額己亥上幸木蘭行圍辛丑張文慶等伏誅甲辰暹羅國長鄭華遣陪臣貢方物乞

封九月癸丑朔賑安徽宿州等處水災乙卯以回匪平封和珅一等男庚申上駐蹕避暑山莊甲子調烏爾圖納遜爲察哈爾都統積福爲綏遠城將軍甲戌上還京師丙子宥綽克托罪庚辰命內大臣西明翰林院侍讀學士阿肅使朝鮮册封世子是月賑陝西華州等三州縣水災冬十月辛卯命重舉千叟宴戊戌賑江西南昌等六縣水災己酉減京師朝審情實句到逾三次人犯罪十一月乙丑諭秋審朝審各犯緩決至三次者分別減等壬申睢州河工合龍庚辰命留保住爲駐藏大臣以福祿爲西甯辦事大臣十二月甲辰諭預千叟宴官民年九十以上者許其子孫一人扶掖大臣年逾七十者如步履稍艱亦許其子孫一人扶掖是歲朝鮮琉球暹羅安南來貢

五十年春正月辛亥朔上以五十年國慶頒詔覃恩有差丙辰舉千叟宴禮宴親王以下三千人於乾清宮賞賚有差丁巳左都御史周煌致仕以紀昀爲左都御史調吳垣爲湖北巡撫以孫永清爲廣西巡撫戊辰召奎林來京以拉旺多爾濟署烏里雅蘇台將軍甲戌喀什噶爾阿奇木伯克阿里木以潛與薩木

薩克交通事覺處斬乙酉賑江西萍鄉等三縣水災丁亥上釋奠先師臨辟雍講學戊子免河南汲縣等十四縣通賦己丑御試翰林院詹事府官擢陸伯焜吳啟爲一等餘陞黜有差試六部陞用翰詹等官擢慶齡爲一等餘陞黜有差辛卯調畢沅爲河南巡撫何裕成爲陝西巡撫甲辰免江南江寧等六府州通賦是月賑江西萍鄉等三縣福建建安等二縣水災河南汲縣等十四縣旱災三月壬子上幸盤山甲寅上詣明長陵奠酒丁巳上駐蹕盤山辛酉截河南山東漕糧三十萬石賑河南衛輝旱災甲子免江蘇安東旱寧通賦丙寅上還京師丁卯以永鐸爲伊犁參贊大臣常青爲西安將軍奎林爲烏魯木齊都統復興爲烏里雅蘇臺將軍以舒常爲工部尙書孫士毅兼署兩廣總督乙亥免直隸朔州等四十九州縣通賦丙子免河南商邱等六州縣上年水災額賦夏四月甲申甘肅肅州等處地震賑恤之壬辰上閱健銳營兵丁酉刑部尙書喀爾阿胡季堂侍郎穆精阿姜晟以檢驗失實降四品頂戴戊戌大學士蔡新致仕是月免河南汲縣等旱災額賦賑祥符等州縣旱災五月壬子免河南祥符等

十六州縣鄭州等三十二州縣新舊額賦積欠甲寅調永保爲江西巡撫陳用
數爲貴州巡撫己未撥兩淮運庫銀一百萬兩交河南備賑丙寅上秋獮木蘭
丁卯山西平陽等屬饑給貧民兩月糧壬申上駐蹕避暑山莊丙子命梁國治
爲東閣大學士兼戶部尙書劉墉協辦大學士以曹文植爲戶部尙書丁丑柘
城盜匪平是月賑江蘇銅山等十六州縣山東陵縣等四十州縣旱災六月壬
午以漕運遲誤薩載等下部嚴議分別賠償乙酉理藩院尙書博清阿卒丙戌
以留保住爲理藩院尙書辛丑以奎林署伊犁將軍永鐸署烏魯木齊都統乙
巳命再截留江西漕糧十萬石於安徽備賑是月賑安徽亳州等八州縣旱災
秋七月己酉調富勒渾爲兩廣總督以雅德爲閩浙總督浦霖爲福建巡撫庚
戌調浦霖爲湖南巡撫以徐嗣曾爲福建巡撫辛酉以李慶葵爲貴州巡撫乙
丑撥戶部銀一百萬兩交河南備賑辛未賑山西代州等六州縣水災乙亥以
奎林爲伊犁將軍永鐸爲烏魯木齊都統八月乙酉命阿桂赴河南勘災兼赴
江南山東查辦河運癸巳上幸木蘭行圍庚子賑陝西朝邑縣水災癸卯以伊

桑阿爲山西巡撫九月己酉命福康安赴阿克蘇安輯回衆以慶桂爲烏什參贊大臣署陝甘總督降海祿爲伊犁領隊大臣命明亮以伊犁參贊大臣署烏什參贊大臣甲寅上駐蹕避暑山莊戊午調永保爲陝西巡撫何裕城爲江西巡撫戊辰上還京師壬申賑江蘇長洲等五十六州縣衛旱災冬十月丁丑朔召勒保松筠回京命佛住駐庫倫會同蘊端多爾濟辦事庚辰賑湖南巴陵等十州縣旱災辛丑賑安徽亳州五十一州縣並鳳陽等九衛旱災是月免甘肅阜蘭等十二廳州縣衛本年雹水災額賦賑直隸平鄉等十六州縣水旱災河南永城等十二州縣旱災十一月乙亥以乾隆六十年乙卯正旦推算日食宣諭定次年歸政是月賑山東嶧縣等九州縣旱災甘肅河州等七州縣水雹災十二月丁丑以御史富森阿條陳地丁錢糧請收本色諭斥爲斷不可行罷之丙戌以明亮爲烏什參贊大臣慶桂爲塔爾巴哈台參贊大臣壬寅禁廣東洋商及粵海關監督貢獻是月賑陝西朝邑等三縣水災是歲朝鮮來貢

清史稿

本紀十五

高宗本紀六

五十一年春正月丙午朔日食免朝賀戊申命戶部撥銀一百萬兩解往安徽備賑辛酉禮部尚書姚成烈卒以彭元瑞代之丙寅以普福爲駐藏大臣庚午江西巡撫何裕城奏糧價日昂由江楚販運過多所致上以意存遏糴切責之命范建中往哈密辦事二月庚辰上御經筵賜宴命工歌新譜抑戒詩歲爲例加福建水師提督黃仕簡太子太保乙酉上幸南苑行圍辛卯命尚書曹文植侍郎姜晟伊齡阿往浙省盤查倉庫壬辰上詣西陵巡幸五臺山免經過地方額賦十分之三丙申上謁泰陵泰東陵丁酉免直隸順德廣平大名三府屬上年災欠銀米己亥以圖薩布爲湖北巡撫癸卯免山西忻州等六州縣逋賦三月丙午上駐蹕五臺山丙辰兩江總督薩載卒調李世傑代之以保寧爲四川總督鄂輝爲成都將軍己未上閱淳沱河閱正定鎮兵壬戌上祭帝堯廟癸亥命李侍堯署戶部尚書甲子賑陝西朝邑等三縣災民庚午上還京師辛未以

伊齡阿爲浙江巡撫夏四月己卯命大學士阿桂往江南籌辦河工乙酉浙江學政寶光題奏嘉興海鹽平陽三縣虧空各逾十萬郡縣採買倉儲俱折收銀兩以便挪移命曹文地等嚴查覆奏賑山西代州等六州縣水災己丑命寶光題會同曹文地等查辦浙江虧空五月丙午命阿桂赴浙會同曹文地等查辦虧空並勘海塘丙辰富勒渾褫職交阿桂等審訊丁巳以孫士毅爲兩廣總督調圖薩布爲廣東巡撫以李封爲湖北巡撫己未以李侍堯署湖廣總督辛未上秋獮木蘭賑四川打箭爐等地震災是月免江蘇上元等五十六州縣衛上年旱災額賦六月丁丑上駐蹕避暑山莊乙酉以福崧署山西巡撫丁亥湖南常德府沅江溢辛丑調富綱爲閩浙總督以特成額爲雲貴總督以畢沅爲湖廣總督江閩爲河南巡撫秋七月戊申免河南商邱等十二州縣上年旱災額賦壬子江蘇清河李家莊河溢丁巳命阿桂由浙江赴清口會同李世傑等辦理堵築事宜己巳曹錫寶劾和珅家人劉全不能指實加恩革職留任閏七月庚辰大學士伯伍彌泰卒召劉秉恬來京以譚尙忠爲雲南巡撫己丑浙江學

政吏部右侍郎寶光鼎祺職庚寅官勒渾論斬乙未命和坤爲文華殿大學士
管理戶部事福康安爲吏部尙書協辦大學士仍留陝甘總督任福長安爲戶
部尙書綽克托署兵部尙書戊戌賑湖南武陵龍陽水災八月丙辰上幸木蘭
行圍庚申調嵩椿爲綏遠城將軍積福爲甯夏將軍九月戊寅上駐蹕避暑山
莊丁亥以勒保爲山西巡撫戊子以永保爲塔爾巴哈臺參贊大臣以巴延三
爲陝西巡撫壬辰上還京師甲午調福長安署兵部尙書以綽克托署戶部尙
書乙未以琅玕爲浙江巡撫己亥皇長孫貝勒綿德卒賑安徽五河等十七州
縣並鳳陽等五衛水災冬十月辛丑朔調富綱爲雲貴總督以常青爲閩浙總
督丁未降畢沅仍爲河南巡撫江蘭仍爲河南布政使授李侍堯湖廣總督丁
巳免直隸安州等四州縣被災額賦有差十一月賑安徽合肥等十七州縣水
災十二月辛丑福建南靖縣匪徒陳薦等作亂捕治之壬子大學士梁國治卒
命兵部尙書王杰在軍機處行走戊午封鄭華爲暹羅國王丙寅福建彰化縣
賊匪林爽文作亂陷縣城知縣俞峻死之命常青徐嗣曾等勦辦是歲朝鮮琉

琉球羅來貢

五十二年春正月辛未林爽文陷諸羅竹塹癸酉命鄂輝署四川總督乙亥宥
富勒渾罪丁丑調李侍堯爲閩浙總督常青爲湖廣總督仍留福建督辦軍務
命舒常署之癸未林爽文陷鳳山知縣湯大全死之甲申常青以守備陳邦光
督義民守鹿仔港收復彰化奏聞丁亥命王杰爲東閣大學士管禮部事調彭
元瑞爲兵部尙書以紀昀爲禮部尙書庚寅允戶部尙書曹文植終養以董誥
代之辛卯命松筠往庫倫辦事丁酉命常青渡臺勦匪二月壬寅林爽文復陷
鳳山犯臺灣府柴大紀督兵民禦之癸卯以李綬爲左都御史乙巳以長麟爲
山東巡撫壬子免臺灣府屬本年額賦丙辰復諸羅甲子上詣東陵丁卯上謁
昭西陵孝陵孝東陵景陵三月癸酉上回蹕丙子以重修明陵成上臨閱申禁
樵採辛巳復鳳山辛卯以姜晟爲湖北巡撫黃仕簡以貽誤軍機褫職令其長
孫嘉謨襲公爵乙未逮黃仕簡下獄夏四月辛丑以常青爲將軍恒瑞藍元枚
爲參贊調藍元枚爲福建水師提督柴大紀署陸路提督戊午上詣黑龍潭祈

兩壬戌賜史致光等一百三十七人進士及第出身有差甲子上閔火器營兵五月丁卯朔烏里雅蘇台參贊大臣貢楚克扎布病免以三丕勒多爾濟代之戊辰授蘭第錫河東河道總督甲戌上秋獵木蘭庚辰上駐蹕避暑山莊湖南鳳凰廳苗作亂總兵尹德禧討平之六月庚戌免浙江仁和場潮衝蕩地額課壬子授柴大紀福建陸路提督兼管台灣總兵事丙辰召福康安赴行在以勒保署陝甘總督秋七月壬辰以海蘭察爲參贊大臣舒亮普爾普爲領隊大臣率侍衛章京等赴台灣勦賊癸巳賑安徽懷遠鳳陽等州縣水災賑山西豐鎮等九廳州縣旱災八月常青免命福康安爲將軍赴台灣督辦軍務辛亥上幸木蘭行圍九月壬申上回駐避暑山莊庚辰上回蹕壬午調柴大紀爲福建水師提督以蔡攀龍爲福建陸路提督並授參贊辛卯以諸羅仍未解圍催福康安徑剿大里杙賊並分兵進大甲溪冬十月丁未命福長安署工部尙書戊申朔修福陵丁未睢州下汛決口合龍丙辰命阿桂赴江南勘高堰等處堤工戊午免江蘇清河等二十三州縣及淮安等五衛本年水災漕項漕米有差辛酉

以福州將軍恒瑞勦賊怯懦召來京調鄂輝代之賑直隸保安等七州縣旱災
壬戌命江蘇浙江撥濟福建軍需錢各五萬貫十一月甲子朔加李侍堯孫士
毅太子太保柴大紀太子少保賜台灣廣東莊泉州莊義民御書扁額壬申以
柴大紀固守嘉義封一等義勇伯世襲免台灣嘉義縣五十四年額賦以巴延
三奏達賴喇嘛遣使稱夷使申飭之乙酉奎林以婪贓褫職逮問以保寧爲伊
犁將軍調李世傑爲四川總督以書麟爲兩江總督陳用敷爲安徽巡撫十二
月丁未福康安等敗賊於崙仔頂莊等處解嘉義圍晉封福康安海蘭察公爵
各賞紅寶石頂四團龍補褂己酉遷常青福州將軍以舒常爲湖廣總督福長
安爲工部尙書以福康安劾柴大紀蔡攀龍戰守之功多不確實諭柴大紀堅
持定見竭力固守蔡攀龍奮勇殺賊竟抵縣城或在福康安前禮節不謹致爲
所憎豈可轉沒其功遽加無名之罪以孫士毅調兵運械不分畛域賞雙眼花
翎戊午以德成奏稱柴大紀貪縱廢弛命福康安李侍堯據實參奏並以喀什
噶爾辦事大臣雅德在福建時徇隱逮之庚申伍拉納護福建巡撫以永鐸爲

盛京將軍尙安爲烏魯木齊都統

五十二年春正月丁卯免兵差經過之福建晉江等二十縣本年額賦有差辛未明興奏山西永寧等處河清丙戌柴大紀褫職逮問福州將軍常青以徇隱柴大紀褫職二月甲午朔獲林爽文賞福康安海蘭察御用佩襲議叙將弁有差皆封大學士和珅三等伯爵大學士阿桂王杰尙書福長安董誥議叙子孫士毅輕車都尉世職乙未釋黃仕簡任承恩壬寅伊犁參贊大臣海祿以劾奎林失實褫職與奎林俱罰在拜唐阿上効力乙巳立先賢有子後裔五經博士辛亥上巡幸天津庚申獲台灣賊首莊大田議叙提督許世亨等有差辛酉免天津府屬通賦壬戌上御閱武樓閱兵三月戊辰命侍郎穆精阿赴湖北會同舒常查案壬申林爽文伏誅癸未再賞福康安海蘭察紫韁金黃瓣珊瑚朝珠及福康安金黃腰帶夏四月辛丑以旱命刑部減徒以下罪丙午上閱健銳營兵庚戌免江蘇清河等十八州縣淮安等五衛上年水災額賦有差己未富勒渾雅德以失察柴大紀論絞五月丁卯蠲河南商邱等六州縣上年水災額賦

有差癸酉蜀直隸保安等七州縣上年水災民田旗地額賦庚辰上秋撥木蘭
癸未看常青罪庚寅賑臺灣難民六月內申富綱奏緬甸孟隕差頭首業渺瑞
洞等齋金葉表文進貢諭護送迅來行在戊戌賑湖南澁浦縣水災免安徽鳳
陽等四府州衛上年水災額賦有差辛丑賑湖北長陽縣水災丁未免陝西華
州等三州縣五十一年水災額賦戊申安南人阮惠等叛逐其國王黎維祁維
祁來求援命係士毅赴廣西撫諭之免山西大同等九州縣上年旱災額賦秋
七月辛酉朔以安南牧馬官阮輝宿奉黎維祁之母及子來奔諭係士毅等撫
恤之壬戌賑山東膠州壽光水災湖北荊州江溢府城及滿城均浸沒諭舒常
等查勘撫恤丁丑賞還閩浙總督李侍堯伯爵子現襲之李奉堯提督銜戊寅
湖北武昌漢陽江溢以畢沅爲湖廣總督伍拉納爲河南巡撫明興爲烏什辦
事大臣賑安徽懷甯等州縣水災柴大紀處斬召姜晟來京以惠齡爲湖北巡
撫戊子廓爾喀據後藏濟隴站拉木命成德與穆克登阿勦之八月甲辰賑湖
北監利石首水災丙午上幸木蘭庚戌以木蘭大水停行圍癸丑廓爾喀復陷

宗喀以鄂輝爲將軍成德爲參贊大臣剿之內辰安南阮岳等遁命孫士毅督許世亨進剿命富綱統兵進駐蒙自戊午上回駐避暑山莊九月壬戌緬甸番目細哈覺控等入覲諭暹羅緬甸現均內附二國應修好不得仍前搆兵戊辰賑湖北沔陽黃岡水災癸酉免安徽宿州等二十一州縣衛上年水災額賦冬十月庚寅廓爾喀侵後藏薩喀命孫士毅出關督剿甲午賑湖北潛江水災丙申賑湖北江夏等三十六州縣水災己亥以黎維祁開弱諭孫士毅選擇黎裔入京朝貢庚子命雲南提督烏大經統兵出關檄諭阮惠等來歸癸卯調舒濂爲駐藏大臣以恒瑞爲伊犁參贊大臣調都爾嘉爲盛京將軍恒秀爲吉林將軍改嵩椿爲西安軍將以興兆代之琳甯爲黑龍江將軍乙卯李侍堯病命福康安署閩浙總督十一月辛酉免安徽望江等二十六州縣衛本年被水額賦有差癸亥李侍堯卒以福康安代之以勒保爲陝甘總督海甯爲山西巡撫丙子修湖北江陵公安各隄免湖北江陵等三十六州縣本年水災額賦有差十二月己丑釋富勒渾雅德孫士毅奏敗賊於壽昌江癸巳又敗賊於市球江丙

中收復黎城復封黎維祁安南國王封孫士毅爲一等謀勇公許世亨爲一等子戊申命孫士毅班師

五十四年春正月己未以元旦受賀朝班不肅褻糾儀御史等職尙書德保摘翎頂都察院鴻臚寺堂官均下部嚴議成德以收復宗喀濟囉克茹拉木奏聞癸酉禮部尙書德保卒以常青代之甲戌以緬甸孟隕悔罪投誠諭令睦隣修好並賜暹羅國王鄭華綵幣令其解仇消釁免福建淡水等六廳縣災欠額賦癸未阮惠復陷黎城廣西提督許世亨等死之召孫士毅來京削公爵調福康安爲兩廣總督以伍拉納爲閩浙總督梁肯堂爲河南巡撫以海祿爲廣西提督甲申安南國王黎維祁復來奔命安插廣西丙戌褫孫士毅職命仍以總督頂戴在鎮南關辦事二月庚寅以京察屆期予大學士阿桂等議叙內閣學士謝墉等下部議處理藩院侍郎福祿原品休致予總督福康安等議叙丁酉勒保陞見以巴延三署陝甘總督和闐領隊大臣格綢額以雙索鞫實處斬甲寅調蘭第錫爲江南河道總督李奉翰爲河東河道總督乙卯以安南瘴癘災荒

不值用兵詳諭福康安三月甲子免甘肅積年逋賦及未完籽種口糧免陝西延安等三府州未完倉穀諭福康安檄阮惠縛獻戕害提鎮之匪乙丑劉塘以上書房師傅曠職降侍郎銜以彭元瑞爲吏部尙書孫士毅爲兵部尙書丁卯上幸盤山夏四月戊子免奉天廣寧鳳凰二城屬上年水災額賦仍賑恤有差丙申旨贈許世亨伯爵令其子承謨襲召孫士毅回京庚子以恒瑞爲烏里雅蘇台將軍福康安署兵部尙書諭福康安安插安南黎氏宗族舊臣子從軍出力之諒山都督潘啟德以都司用壬寅命阿桂覆勘荊州堤工丁未宣諭安南水土惡劣決計不復用兵阮惠已三次乞降果赴闕求恩可量加封號朕撫馭外夷無不體上天好生之德從未收窮兵黷武辛亥賜胡長齡等九十八人進士及第出身有差調都爾嘉爲黑龍江將軍嵩椿爲盛京將軍恒秀爲綏遠城將軍琳寧爲吉林將軍癸丑以阮惠不親來籲懇遣阮光顯入關進貢諭福康安卻之內辰豁直隸宣化等四縣上年旱災額賦五月己未免官兵經過之廣柳西州等五府屬本年額賦福康安等奏安南阮惠遣其姪阮光顯貢表貢乞

降並額懇入覲許之却其貢乙酉增伊犁惠遠城惠寧城閏五月庚寅上秋獵
木蘭辛卯免奉天廣寧等七城上年水災額賦甲午賑雲南通海等五州縣地
震災民六月免安徽安慶等七府州五十三年水災額賦甲子以管幹貞爲漕
運總督戊辰賑直隸蠡縣水災庚午命兵部尙書孫士毅軍機處行走壬申以
郭世勳爲廣東巡撫癸酉以陳步瀛爲貴州巡撫丙子福康安奏阮惠即阮光
平因赦其前罪准令降附具表謝恩進貢並求於明年到京祝釐上以其情詞
肫切冊封爲安南國王並賜敕諭免湖北江夏等二十四州縣上年水災額賦
秋七月乙酉朔以決河下注泗州一帶諭賑恤災民丁酉賑直隸安州等八州
縣水災庚子戶部尙書綽克托卒丙午以巴延三爲戶部尙書秦承恩爲陝西
巡撫戊申安南貢使阮光顯等入覲八月乙丑賑河南永城臨漳等縣水災戊
辰賑安徽宿州水災己巳上幸木蘭行圍甲戌賑直隸清苑等三十四州縣水
災九月己丑廓爾喀貢使入覲封拉特納巴都爾王爵巴都爾薩野公爵庚寅
上回駐避暑山莊辛卯賑江蘇銅山等十一州縣水災丙申賑吉林屬琿春水

災幣應交義倉糧石及上年借給倉穀丁酉上回蹕丙午安南黎維祁自保樂
襲牧馬爲阮光平所敗諭福康安如黎維祁來奔收納之辛亥左都御史阿楊
阿卒以舒常代之冬十月癸丑察哈爾都統烏爾圖納遜罷以保泰代之命伍
爾伍遜爲科布多參贊大臣乙卯以佛佳爲烏里雅蘇台參贊大臣賑吉林打
牲烏拉等處水災己未睢甯決口合龍辛酉賑湖南華容等縣水災十一月乙
酉安南國王阮光平以受封進謝恩貢物允之內戊免安徽宿州等十四州縣
衛通賦庚寅命福康安將黎維祁及其屬人送京師隸漢軍旗籍以黎維祁爲
世管佐領癸巳四川總督李世傑病命侍衛慶成帶醫診視以孫士毅署之彭
元瑞署兵部尙書戊戌免盛京等五城借倉穀十二月庚申追奪故大學士馮
銓等諡辛未上以來年八旬萬壽命鑄八徵耄念之寶

五十五年春正月壬午朔以八旬萬壽頒詔覃恩有差普免各直省錢糧己丑
頒恩詔於朝鮮安南琉球暹羅等國王辰賞大學士和珅黃帶四開襖袍賜安
南國王阮光平金黃鞵帶乙巳朝鮮國王李祘表賀萬壽貢方物己酉琉球國

王尙穆進表謝恩貢方物二月壬子朔以河南考城城工錯繆降江蘭道員畢
沅等褫職仍留任癸丑免直隸永清武清五十四年水災額賦己未上詣東陵
西陵巡幸山東免經過直隸州縣錢糧十分之三壬戌上謁昭西陵孝陵孝東
陵庚午上謁泰陵秦東陵辛未免直隸各屬節年因災緩徵錢糧壬申命福康
安帶同阮光平入覲郭世勳兼署兩廣總督乙亥免雲南通海等五州縣五十
四年分地震災田額賦並除傍海震沒田賦免經過山東錢糧十分之三降直
隸總督劉綬侍郎以梁肯堂爲直隸總督調穆和蘭爲河南巡撫戊寅免山東
各屬因災緩徵銀兩以福崧爲安徽巡撫三月乙酉上登岱甲午上謁少昊陵
至曲阜謁先師廟乙未釋奠賜衍聖公孔憲培及孔氏族人等章服銀幣有差
丙申上謁孔林庚子免烏魯木齊各州縣額徵地糧十分之一乙巳緬甸國長
孟隕遣使表賀萬壽貢馴象請封號命封爲緬甸國王免直隸昌平等七州縣
水災旗地租銀南掌國王召溫猛表賀萬壽貢馴象己酉免直隸長蘆等五場
上年水災竈課夏四月丁巳上幸天津府諭伍拉納查浙江浮收漕糧情弊己

未大學士嵇璜重與恩榮宴御製詩章賜之辛酉命吉慶會同嵩椿勘明英額邊至懷陽邊乙丑免安徽宿州靈璧等八州縣衛上年水災額賦上還京師丙寅上詣黑龍潭祈雨閔鶚元罷調福崧爲江蘇巡撫何裕城爲安徽巡撫庚午以書麟覆奏欺飾下部駁議仍留任閔鶚元褫職逮問壬申免河南永城五十四年水災額賦癸酉以孫士毅爲四川總督李世傑爲兵部尙書乙亥賜石韞玉等九十七人進士及第出身有差己卯免山西太原遼州等十六府州並歸化城等處額賦十分之三庚寅上幸避暑山莊庚子賞黎維祁三品職銜壬寅免西藏所屬三十九部落錢糧己酉書麟褫職逮問福崧兼署兩江總督韓鐸赴江南幫辦河工六月壬子調孫士毅爲兩江總督保寧署四川總督永保署伊犁將軍乙卯以陳川敷爲廣西巡撫閔鶚元論斬丁巳免直隸霸州等五十四廳州縣並各屬旗地上年水災額賦戊午除湖南乾州等五廳縣苗民雜糧秋七月己丑安南國王阮光平入覲庚寅以朱珪爲安徽巡撫甲午賑直隸朝陽天津水災丙申賑奉天錦州九關臺山東平原禹城等縣水災丁酉兵部尙

書李世傑以失察書吏休致己亥起劉我爲兵部尙書戊申上還京師賑江蘇
碭山等縣安徽宿州河南永城夏邑水災江蘇碭山王平莊河決命福崧赴宿
州辦河工丁未賑山東臨清水災八月庚戌暹羅國王鄭華表賀萬壽貢方物
琅玕以失察漕糧自劾罷之調海甯爲浙江巡撫書麟爲山西巡撫辛酉上八
旬萬壽節御太和殿王貝勒貝子公文武大臣蒙古汗王貝勒貝子公額駙台
吉回部王公台吉伯克哈薩克安南國王朝鮮緬甸南掌貢使各省土司臺灣
生番等行慶賀禮禮成寧壽宮乾清宮賜宴如儀己巳刑部尙書喀爾阿卒以
明亮代之命舒常兼署九月戊寅賑安徽泗州水災癸未命安南國王阮光平
歸黎維祁親屬及舊臣之在其國者己丑上閱健銳營兵甲午賑山東平原等
二十七州縣水災庚子長麟以讞獄不實褫職調惠齡爲山東巡撫以福甯爲
湖北巡撫畢沅兼署之冬十月丙辰賑山東平原等二十七州縣水災甲子命
保甯回伊犁將軍以鄂輝爲四川總督壬申以福崧爲浙江巡撫起長麟署江
蘇巡撫賑甘肅阜蘭等三縣霜災十一月丁丑朔以浦霖爲福建巡撫馮光熊

爲湖南巡撫內戌加大學士王杰太子太保尙書彭元瑞董誥胡季堂福長安將軍保寧太子少保乙未釋富勒渾雅德戊戌命慶成同尹壯圖往山西盤查倉庫壬戌賑奉天錦縣等三州縣水災戊辰命吏部尙書彭元瑞協辦大學士五十六年春正月丁丑賑江蘇蕭縣等三縣安徽宿州等三州縣上年水災己卯賑直隸文安等三十州縣山東平原等二十七州縣水災乙酉以尹壯圖覆奏欺罔褫職治罪戊戌袁鳳鳴處斬朝鮮暹羅緬甸均遣使謝恩貢方物賞賚筵宴如例己亥以保寧爲御前大臣甲辰調劉塘爲禮部尙書紀昀爲左都御史二月己酉諭朕孜孜求治兢惕爲懷尹壯圖逞臆妄言亦不妨以謗爲規加恩免尹壯圖治罪以內閣侍讀用戊午御試翰林詹事等官擢阮元等二員爲一等餘陞黜有差乙亥賑奉天錦州等處上年水災旗地人戶並蠲租有差戊寅上幸盤山甲申免甘肅皋蘭等三縣上年霜災額賦丁酉以永保爲內大臣夏四月丁卯免山東臨清等三十州縣衛上年水災額賦辛未彭元瑞以瞻徇降侍郎命孫士毅爲吏部尙書以書麟爲兩江總督長麟暫署調馮光熊爲山

西巡撫以姜晟爲湖南巡撫五月庚寅以長麟爲江蘇巡撫乙未上秋獮木蘭辛丑上駐蹕避暑山莊六月甲辰朔免直隸霸州等六十九廳州縣上年水災額賦秋七月庚辰免江蘇江甯等五府州屬因災積逋半賦甲申以緬甸國王孟隕資送羈留內地人民嘉賚之己亥蠲安徽宿州等十九州縣衛上年水災額賦辛丑蠲陝西朝邑等二縣逋賦八月丁未命喇特納錫第爲喀喇沁札薩克一等塔布囊戊午上幸木蘭行圍甲子上行圍廓爾喀以逋欠誘圍喇嘛噶倫布撥西藏命四川總督鄂輝將軍成德勦之命孫士毅署四川總督己巳命福康安來京祝其母生辰郭世勳署兩廣總督廓爾喀陷西藏定日各寨據濟甯九月丙子上回駐避暑山莊庚辰召嵩椿回京以琳寧爲盛京將軍調恒秀爲吉林將軍丙戌上回蹕戊子唐古忒兵與達木蒙古兵禦廓爾喀失利唐古忒公札什納木札勒及達木協領澤巴傑等死之命乾清門侍衛額勒登保等赴西藏軍營壬辰以保泰懦怯褫職命奎林赴藏辦事賞舒濂副都統銜協同辦理以達賴喇嘛等堅守布達拉嘉獎之命劉墉署吏部尙書甲午以廓爾喀

圍扎什倫布諭鄂輝等進勦辛丑豁奉天廣寧縣通賦冬十月乙巳宥閔鶚元罪丁未廓爾喀入扎什倫布尋遁去癸丑戶部尙書巴延三以浮估城工褫職調福長安代之以金簡彭元瑞爲滿漢工部尙書丙辰以安南開關通市改廣西龍州通判爲同知乙丑諭王大臣不必兼議政虛銜十一月癸酉授福康安爲將軍海蘭察奎林爲參贊征廓爾喀辛巳鄂輝成德褫職以惠齡爲四川總督奎林爲成都將軍吉慶爲山東巡撫癸未以陳淮爲貴州巡撫十二月辛亥命海蘭察等及索倫達呼爾兵由西甯進藏丁卯召都爾嘉回京以明亮爲黑龍江將軍明興爲喀什噶爾參贊大臣

五十七年春正月壬申賞七代一堂致仕上駟院卿李質穎御書扁額免奉天直隸安徽湖南廣東通賦乙亥以達賴喇嘛復遣丹津班珠爾等私與廓爾喀議和諭止之內子追論巴忠與廓爾喀議和擅許歲銀罪甲午以蘇凌阿爲刑部尙書二月壬寅成德奏敗賊於拍甲嶺癸卯予大學士阿桂等尙書福長安等侍郎德明等總督福康安等巡撫長麟等敘裁河東鹽政鹽運使等官移山

西河東道駐運城丁未命皇十五子嘉親王祭先師孔子免奉天錦州府屬上年旱災額賦已巳命侍郎和琳管理藏務鄂輝等奏收復聶拉木諭以遲延斥之三月丁丑上詣西陵巡幸五臺山免經過地方本年錢糧十分之三戊寅允濟甯呼圖克圖慧通禪師法號以帕克哩營官番衆收復哲孟雄宗木賚之辛巳上謁泰陵泰東陵壬午免直隸大興等八州縣積欠米穀甲申加福康安大將軍庚寅免五臺本年錢糧十分之五大同朔平二府屬未完通賦辛卯上駐蹕五臺山夏四月己亥朔以和闐辦事大臣李侍政失察邁瑪特尼雜爾下部嚴議甲辰上閱漳沱河以貢楚克扎布爲烏里雅蘇臺參贊大臣丁未上祭帝堯廟甲寅上還京師乙卯上詣黑龍潭祈雨命刑部清理庶獄減徒以下罪閏四月甲申以久旱諭臺灣及沿海各省詳鞠命盜各案母有意從嚴蜀河南湯陰等五縣上年旱災額賦丙申以久旱下詔求言丁酉雨以失陷札什倫布治仲巴呼圖克圖及孜仲喇嘛等罪命和琳鄂輝宣諭達賴喇嘛等五月辛丑定安南國兩年一貢六年遣使一朝丁未上幸避暑山莊免經過地方錢糧十分

之五戊申調長麟爲山西巡撫以奇豐額爲江蘇巡撫辛亥允霍罕額爾德尼伯克那爾巴圖遣使入貢癸丑上駐蹕避暑山莊六月甲戌福康安奏克廓爾喀所踞擦木要隘丁丑賑江西南豐廣昌水災福康安奏殄瑪噶爾轄爾甲山梁之賊己卯福康安等奏克濟甯辛巳調陳淮爲江西巡撫馮光熊爲貴州巡撫丙戌福康安等奏攻克熱索橋丁酉福康安等奏攻克協布魯寨秋七月甲辰賑直隸河間等處旱災順直宛平玉田等州縣蝗己酉福康安等克廓爾喀東覺山梁並雅爾賽拉等處營卡成德等克扎木鐵索橋等處八月辛未成德克多洛卡隴岡等處命孫士毅駐前藏督糧運癸酉命福康安爲武英殿大學士孫士毅爲文淵閣大學士調金簡劉墉爲吏部尙書和琳爲工部尙書紀昀爲禮部尙書寶光卽爲左都御史庚辰以博興爲庫倫辦事大臣丙戌福康安等奏克噶勒拉堆補木城卡阿滿泰墨爾根陣亡成德等克利底大山賊卡戊子福康安奏廓爾喀曾拉時納巴都爾等乞降上以其悔罪乞降許之命班師丙申賑陝西咸寧等六州縣旱災九月丁酉上還京師己亥諭征廓爾喀功賞

福康安一等輕車都尉晉海蘭察二等公爲一等議敘孫士毅等各有差丙午
上命福康安孫士毅等會商西藏善後事宜命御前侍衛惠倫等齎金奔巴瓶
往藏貯呼畢勒罕名姓由達賴喇嘛等對衆拈定壬子復廓爾喀王公封爵定
五年一貢冬十月戊辰廓爾喀貢使入覲己巳賑河南安陽等十六縣災民蠲
緩新舊額賦有差己卯免嵇璜阿桂翰林院掌院學士以和珅彭元瑞代之壬
午賑直隸河間任邱五州縣旱災並免順天等十三府州屬被災旗民額賦乙
酉郭世燾奏英吉利遣使請由天津進貢允之丁亥以鄂輝隱匿廓爾喀謝恩
表貢覲職交福康安等嚴鞠之賑陝西咸陽等十四州縣旱災癸巳調圖桑阿
爲綏遠城將軍十一月丙午賑山東德州等二十州縣旱災十二月庚午定唐
古武番兵訓練事宜鑄銀爲錢文曰乾隆寶藏甲戌免長蘆興國等五場並滄
州等七州縣被災額地額賦丙子以長麟爲浙江巡撫蔣兆奎爲山西巡撫以
伊犁回民地畝雪災免本年額穀癸未賑河南安陽等二十五縣旱災辛卯命
永遠枷號鄂輝等於西藏

五十八年春正月內申賑河南林縣等五縣陝西威寧等三州縣旱災己亥賑直隸保定等二十一州縣旱災庚子改杭州織造爲鹽政兼管織造事改鹽道爲運司南北兩關稅務歸巡撫管理以全德爲兩浙鹽政恒秀回吉林將軍乙巳敕諭安南國王阮光平睦鄰修好慎守封疆賜以綵幣丙辰安南國王阮光平卒以世子阮光纘嗣乙亥免河南安陽等二十五縣上年旱災額賦壬午命喀什噶爾阿木奇伯克作爲喀什噶爾協辦大臣三月丁酉上幸盤山庚子上駐蹕盤山甲辰禮部尙書常青卒以德明代之戊申諭於雍和宮設金奔巴瓶飭理藩院堂官掌印札薩克喇嘛等公同掣蒙古所出之呼畢勒罕丁未上回蹕乙卯調馮光熊爲雲南巡撫以英善爲貴州巡撫戊午領侍衛內大臣海蘭察卒夏四月壬申命松筠爲內務府總管大臣在御前侍衛上行走辛巳通諭設金奔巴瓶於前藏大昭及雍和宮公同掣報出呼畢勒罕以除王公子弟私作呼畢勒罕陋習乙酉刪除大學士兼尙書銜翰林院掌院學士兼禮部侍郎銜順天府府丞兼提督學政銜丁亥賜潘世恩等八十一人進士及第出身有

差戊子命於乾隆五十九年秋特開鄉試恩科六十年春爲會試恩科庚寅廓爾喀歸西藏底瑪爾宗地方以西藏卡外之拉結撒黨兩處歸廓爾喀五月乙未命廣西按察使成林赴安南昇隆城賜奠冊封丁未上幸避暑山莊己酉以明興未奏遣回人赴霍罕等處辦理外藩事件罷喀什噶爾參贊大臣調永保代之以伍彌伍遜爲塔爾巴哈台參贊大臣貢楚克札布爲科布多參贊大臣以特成額爲烏里雅蘇台參贊大臣辛酉加封福康安爲一等忠銳嘉勇公癸丑上駐蹕避暑山莊六月己卯賑四川秦寧地震災乙酉英吉利貢船至天津戊子於通州起陸並命在天津筵宴之秋七月癸巳命和琳稽覈商出入壬寅命英吉利貢使等住宏雅園金簡伊齡阿於圓明園分別安設貢件己酉以旱命刑部清理庶獄減徒以下罪庚午上御萬樹園大幄英吉利國正使馬夏爾尼副使斯當東等入覲辛未調福康安爲四川總督以惠齡暫代長麟爲兩廣總督調吉慶爲浙江巡撫惠齡爲山東巡撫壬午免長蘆官臺等二場潮災蠲地額賦丙戌上還京師戊子以慶桂爲兵部尙書庚寅諭英吉利貢使由內河

水路赴廣東澳門附船回國九月丁酉加長麟太子少保命松筠護送英吉利使臣等至浙江定海甲辰調福甯爲山東巡撫惠齡爲湖北巡撫丙午以安徽無爲等三州縣水災實口糧有差冬十月癸亥安南國王阮光纘表進謝恩貢物二分納其一戊子以長麟奏英吉利使稱再進表章貢物呈總督轉奏諭係援例而行並無他意國王可安心再來表貢亦不拘定年限十一月甲午命和寧赴藏幫同和琳辦事戊午以上年各省奏報民數三萬七百四十六萬有奇較康熙四十九年增十五倍諭生之者寡食之者衆勢必益形拮据各省督撫及有牧民之責者務當勸諭化導俾皆儉樸成風服勤稼穡惜物力而盡地利共享升平之福己未以安南等國進象已多諭雲貴兩廣督撫檄卻象貢十二月癸未伍拉納陛見命吉慶署閩浙總督

五十九年春正月庚寅免直隸山東河南通賦十分之三庚戌管幹貞病免命書麟兼署漕運總督乙卯恒秀以侵帑褫職調寶琳爲吉林將軍松筠署之戊午安置安南內附人黎維治於江南二月庚申以明年元旦上元值日月食諭

修省毋舉行慶典癸亥廓爾喀遣使進表貢丁亥增造廣東水師戰船三月己丑恒秀論絞庚子上巡幸天津免經過地方及天津府屬額賦十分之三免天津府屬逋賦免大興等十三州縣逋賦十分之四壬子上駐蹕天津府夏四月壬戌常雩命皇八子儀郡王永璉代行禮癸亥上還京師丁丑上詣黑龍潭祈雨五月丙申京師雨甲辰郭世勳病免調朱珪爲廣東巡撫陳用敷爲安徽巡撫丙午以直隸保定等八十三州縣旱命賞給一月口糧減奉天商販豆麥等項經過直隸山東關津稅辛亥上幸避暑山莊免經過地方錢糧有差六月丙辰朔以山東歷城等五十一州縣旱給貧民一月口糧除山東臨清州水衝地畝田賦丁巳上駐蹕避暑山莊庚午設唐古忒西南外番布魯克巴哲孟雄作木朗洛敏湯廓爾喀各交界鄂博秋七月戊子保定河決庚寅河南丹沁二河決辛卯賑山西平定等處水災己亥賑山東臨清等州縣水災辛丑賑直隸天津等處水災癸卯南河豐北廳曲家莊河決甲辰書麟以徇隱鹽政巴密阿交結商人褫職調富綱爲兩江總督命蘇凌阿署之調福康安爲雲貴總督以和

琳爲四川總督孫士毅署之以駐藏辦事松筠爲工部尙書乙巳命馮光熊署雲貴總督大學士嵇璜卒召孫士毅入閣辦事癸丑停本年及明年木蘭行圍免直隸保定等府屬河南衛輝等府屬山東臨清等五州縣山西代州等三州縣被水額賦八月丁巳以直隸天津河間二府水災重免因災緩征額賦戊午永定河南上決口合龍己巳以明歲御宇屆六十年普免各省漕糧一次甲戌上回蹕調福甯爲河南巡撫穆和蘭爲山東巡撫江蘭護之福康安奏四川大甯教匪謝添秀等傳習邪教蔓延陝西湖北河南諭嚴爲捕治丁丑免直隸通州等二十三州縣逋賦甲申畢沅降山東巡撫罰繳湖廣總督養廉五年以福甯爲湖廣總督穆和蘭留爲河南巡撫九月己丑賑湖北沔陽等州縣水災丙申以秀林爲吉林將軍己亥賑福建漳泉二府水災減直隸遵化內務府官地租命福甯駐襄陽督緝邪教案犯辛丑以校正石經加彭元瑞太子少保銜癸卯賑廣東高要等縣水災以湖北來鳳縣教匪段漢榮等糾衆拒捕諭責畢沅廢弛戊申免齊齊哈爾等三城水災逋賦冬十月丙辰免河南汲縣等九縣山

東臨清等十州縣通賦壬戌勒保奏獲邪教首犯劉松命安徽嚴緝其徒劉之
協癸亥荷蘭入貢乙丑免福建漳州府屬四廳州縣本年水災額賦戊辰命將
科布多威豁爾等七卡移駐原處北界餘地賞杜爾伯特汗瑪克素爾札布等
游牧已卯調陳用敷爲湖北巡撫惠齡爲安徽巡撫辛巳釋恒秀罪十一月丙
戌以河南扶溝縣知縣劉清鼎疏防劉之協潛逃革逮穆和蘭下部嚴議壬辰
免山東臨清等州縣本年漕賦壬寅命富綱署刑部尙書甲辰穆和蘭褫職發
烏魯木齊効力以阿精阿爲河南巡撫十二月丙辰普免各省積年通賦丙子
吏部尙書金簡卒以保甯代之以明亮爲伊犁將軍戊寅命舒亮爲黑龍江將
軍改級遠城將軍圖桑阿爲西安將軍以永琨代之

六十年春正月甲申朔日食免朝賀乙酉賑直隸天津等二十州縣河南汲縣
等十四縣山東臨清等十州縣上年被水貧民有差丙戌召蘇凌阿來京調福
甯爲兩江總督復以畢沅爲湖廣總督王德爲山東巡撫戊子調陳用敷爲貴
州巡撫英善爲湖北巡撫畢沅兼署乙未以固倫額駙豐紳殷德爲內務府大

臣辛丑免山東積年逋賦庚戌免江蘇積年逋賦免江西應緩征銀穀二月癸丑朔免廣東積年逋賦陳用敷以查拏要犯劉之協辦理錯謬褫職逮問調姚葵爲貴州巡撫以成林爲廣西巡撫丙辰免陝西積年逋賦貴州松桃廳苗匪石柳鄧等湖南永綏苗匪石三保等作亂戊午湖南苗匪陷乾州廳同知宋如椿等死之命福康安往勦畢沅駐常德籌辦糧餉庚申以大學士阿桂等書上諭不能稱旨停甄叙侍郎成策等下部議處予總督福康安等議叙辛酉貴州苗匪圍鎮遠鎮總兵珠隆阿於正大營免奉天廣寧錦州旗地逋賦免甘肅皋蘭等四十五州縣積年逋賦丙寅命四川總督和琳赴酉陽州備苗孫士毅仍留四川辦理報銷丁卯免浙江積年民地竈地逋賦己巳苗匪陷永綏廳鴉西寨鎮竄鎮總兵明安圖等死之辛未湖南永順苗匪張廷仲等作亂援永靖瀘溪丙子免安徽積年逋賦壬午貴州苗匪擾思南印江一帶竄入四川秀山福康安赴銅仁督勦命德楞泰領巴圖魯侍衛等赴貴州軍營閏二月乙酉福康安奏解正大營之圍壬辰馮光熊留爲貴州巡撫調姚葵爲雲南巡撫以苗匪

亂免貴州銅仁府屬松桃正大等處額賦乙未上詣東陵免經過地方錢糧十分之三戊戌上謁昭西陵孝陵孝東陵景陵己亥福康安奏解嗅臘圍乙巳福康安奏攻克石城剿除嚴洞苗匪丁未上謁泰陵泰東陵奠孝賢皇后陵免兩淮場竈積欠戊申福康安奏解松桃脂圍三月乙卯和琳奏肅清秀山後路命往松桃與福康安會剿以孫士毅署四川總督己未福康安奏殄除長冲卡落苗匪進兵楚境命額勒登保迅赴福康安軍營己卯福康安奏解湖南永綏匪圍夏四月辛卯臺灣彰化匪徒陳周全等作亂陷縣城尋復之癸巳寶光鼎以會試衡文失當降調以朱珪爲左都御史仍留廣東巡撫任己亥以魁倫劾洋盜肆行命浦霖來京候旨調姚棻爲福建巡撫以魁倫署之江蘭爲雲南巡撫庚子賜王以銜等一百十一人進士及第出身有差癸卯賞會試薦卷文理較優之舉人徐忻傅淦李端內閣中書戊申上詣廣潤祠祈雨是夜雨丁未免貴州官兵經過地方本年額賦有差福康安等奏克黃瓜寨己酉以福寧惠齡經理湖南軍務未竣命蘇凌阿仍署兩江總督費淳爲安徽巡撫庚戌免福建龍

溪等四縣上年水災額賦有差匪首陳周全等伏誅五月丙辰上幸避暑山莊
伍拉納浦霖以辦理災賑不善褫職勒治命魁倫兼署閩浙總督免經過地方
本年錢糧十分之三丁巳調費淳爲江蘇巡撫仍留惠齡爲安徽巡撫福康安
等奏克構皮寨及蘇皮寨等處調福康安爲閩浙總督勒保爲四川總督以宜
綿爲陝甘總督壬戌上駐蹕避暑山莊甲子以福建倉庫虧缺查實申飭科道
無人奏及並命嗣後陳奏地方重大事件毋忝言責召阿精阿來京以景安爲
河南巡撫丁卯召惠齡來京以汪新爲安徽巡撫戊辰命蘇凌阿駐清江浦兼
署江蘇巡撫辛未以于敏中營私玷職褫輕車都尉世職六月壬午以湖南苗
匪擾鎮筸後路諭責福甯怯懦劉君輔株守命惠齡仍署湖北巡撫戊子以旱
命刑部清理庶獄減徒以下罪承德府如之庚寅福康安等奏克沙兜多喜等
處苗寨乙未賑廣東南海等縣水災戊申姚燾以質訊解任命魁倫兼署福建
巡撫長麟署閩浙總督秋七月庚申德明以累累滋陽縣知縣陳照自縊論絞
乙丑免湖北江陵等十二州縣衛上年水災額賦丙寅以福康安等奏連克苗

塞渡大烏草河資珍物壬申哲布尊丹巴呼圖克圖等入覲召見賜茶八月壬午調永琨爲烏里雅蘇台將軍恆瑞爲綏遠城將軍癸未賜南掌國王召溫猛緬甸國王孟隕敕諭均資文綺丙申允兵部尙書劉峨乞休以朱珪代之仍留廣東巡撫任以金士松爲左都御史丁未免直隸通州等五十二州縣積欠旗租福康安等進駐楊柳坪九月辛亥上御勤政殿召皇子皇孫王公大臣等入見宣示立皇十五子嘉親王爲皇太子明年爲嗣皇帝嘉慶元年撫恤江蘇海州等七州縣水災壬子皇太子及王公内外文武大臣蒙古王公等各奏籲請俟壽躋期頤再舉行歸政典禮不允丙辰富勒渾雅德以前爲總督婪贓均褫職分別發熱河伊犁効力己未上閱健銳營兵冊封福康安忠銳嘉勇貝子和琳一等宣勇伯庚申上命皇太子謁東陵西陵乙丑黑龍江將軍舒亮以婪索褫職鞠治調永琨代之命圖桑阿爲烏里雅蘇臺將軍改恆瑞爲西安將軍以烏爾圖納遜代之命博興爲察哈爾都統調特克慎爲庫倫辦事大臣策巴克爲西甯辦事大臣丙寅明亮以任黑龍江時侵漁貂皮褫職命保壽爲伊犁將

軍己巳舒亮論較明亮留烏魯木齊効力癸酉以奉天山西四川湖南貴州廣西賦無逋欠免明年正賦十分之二乙亥免福建龍溪等六縣華封羅溪二縣上年被水額賦冬十月戊寅朔頒嘉慶元年時憲書庚辰福康安等奏擒匪首吳牛生賞福康安之子德麟副都統銜和琳黃帶餘議敘賞賚有差甲申以伍拉納等貪黷敗檢成其子於伊犁長麟以徇庇伍拉納浦霖褫職命來京以魁倫署閩浙總督姚蔡署福建巡撫乙酉普免天下嘉慶元年地丁錢糧丙戌伍拉納浦霖處斬辛卯壬辰以額勒登保德楞泰勦捕苗匪奮勇授內大臣乙未命定丙辰年傳位典禮癸卯命明年正月初吉重舉千叟宴十一月丁巳福康安等奏克天生寨等處加和琳太子少保銜賞福康安和琳上用黃裏元狐端罩各一庚申賑奉天金州熊岳錦州三城寧海等三州縣旱災旗民免額賦有差乙丑上命皇太子居毓慶宮十二月戊寅朔諭曰朕於明年歸政後凡有繕奏事件俱書太上皇帝其奏對稱太上皇戊子賑貴州銅仁被擾難民福康安等奏克天星等苗寨壬寅允朱珪收英吉利國王表貢賜敕嘉賚交英商波郎

齋回並以其表言勸廓爾喀投順于賜敕內以無須英國兵力告之甲辰賜琉球國王尙溫敕諭丁未以來歲元旦傳位皇太子爲嗣皇帝前期遣官告祭天地宗社是歲緬甸南掌暹羅安南英吉利琉球廓爾喀來貢嘉慶元年正月戊申朔舉行授受大典立皇太子爲皇帝尊上爲太上皇帝軍國重務仍奏聞秉訓裁決大事降敕旨宮中時憲書用乾隆年號三年冬上不豫四年正月壬戌崩壽八十有九是年四月乙未上尊諡曰法天隆運至誠先覺體元立極敷文奮武孝慈神聖純皇帝廟號高宗九月庚午葬裕陵

論曰高宗運際邛隆勵精圖治開疆拓宇四征不庭揆文奮武於斯爲盛享祚之久同符聖祖而壽考則逾之自三代以後未嘗有也惟耄期倦勤蔽於權倖上累日月之明爲之歎息焉

清史稿

本紀十六

仁宗本紀

仁宗受天興運敷化綏猷崇文經武孝恭勤儉端敏英哲睿皇帝諱顥瑛高宗第十五子也母魏佳氏追尊孝儀皇后乾隆二十五年十月初六日生五十四年封嘉親王六十年九月策立爲皇太子高宗將傳位焉以明年爲嘉慶元年嘉慶元年丙辰春正月戊辰朔舉行內禪上侍高宗徧禮於堂子奉先殿壽皇殿高宗御太和殿授璽上卽位尊高宗爲太上皇帝訓政頒詔天下賜宴宗藩庚戌立皇后喜塔拉氏壽宮舉行千叟宴太上皇帝蒞焉九十以上者召至御座賜卮酒如故事辛酉祈穀於上帝癸亥上奉太上皇帝賜廷臣宴於正大光明殿凡賜宴皆如之辦理苗疆大學士福康安等奏攻克朗坡進攻平隴湖北枝江宜都教匪起二月丁丑朔釋奠先師孔子戊寅祭社稷庚辰初舉經筵辛巳勅甘肅貴德廳建文廟戊子春分朝日於東郊己丑上御乾清門聽政園居則御勤政殿以爲常己亥湖北當陽教匪起戕官西安將軍恒瑞率兵二千

勦之辛丑祭懋代帝王廟內午湖北巡撫惠齡奏獲教匪竊傑人三月庚戌停四川續徵軍需銀兩辛亥上耕藉田四推壬子上奉太上皇帝謁陵丁卯車駕還京己巳皇后祀先蠶癸酉恒瑞奏收復湖北竹山壬申留保住免以烏爾圖納遜爲理藩院尙書富銳爲綏遠城將軍永慶爲蒙古都統夏四月丙子朔時享太廟命宜綿永保恒瑞孫士毅等分勦湖北教匪辛巳常雩祀天於圓丘以勦來風功晉四川總督孫士毅三等男勅伊犁貢馬由草地行丁酉上侍太上皇帝祈雨黑龍潭是日雨庚子賜趙文楷等一百一人進士及第出身有差五月戊申詔額魯特來京有出痘者嗣後由草地赴熱河覲見辛酉祭地於方澤壬戌上奉太上皇帝避暑木蘭乙丑以富綱爲漕運總督壬申大學士貝子福康安卒於軍六月乙亥朔日有食之以魁倫爲閩浙總督朱珪爲兩廣總督以紀昀爲兵部尙書金士松爲禮部尙書沈初爲左都御史丙子調福昌爲福州將軍以明亮署廣州將軍丁丑除山西代州三州縣水冲田賦戊寅和琳奏獲苗匪石三保解京誅之癸巳江南豐汛河決秋七月辛亥明亮奏勦平孝感縣

教匪大學士四川總督三等男孫士毅卒於軍八月丙子以雨停秋獮壬寅和琳卒於軍命明亮鄂輝接統軍務九月乙巳車駕還京冬十月戊寅上萬壽節詣太上皇帝行禮禮成受廷臣賀己卯以董誥爲大學士王杰以足疾疏辭軍機處南書房禮部事允之命沈初爲軍機大臣辛巳贈征苗陣亡提督花連布太子少保予世職丙戌調沈初爲兵部尙書以紀昀爲左都御史十一月庚戌豐汛河工合龍復決予湖北死事巡檢王翼孫訓導甘杜典史浦寶光世職甲子冬至祀天於圓丘乙丑江西巡撫陳准有罪逮問遣戍己巳以湖北教匪偷渡滾河入秦襁永保職逮問以惠齡統其軍十二月戊子湖南苗匪平封明亮伯爵額勒登保侯爵及德楞泰等世職有差庚子祫祭太廟辛丑上奉太上皇帝御太和殿賜宴朝正外藩是歲免順天江蘇山西湖南福建等省三十九廳州縣災賦逋賦各有差會計天下民數二萬七千五百六十六萬二千四十四名口穀數三千七百二十萬六千五百三十九石一升二合七勺朝鮮入貢二年丁巳春正月丁卯貴州南籠種苗夷婦王囊仙作亂命總督勒保剿之庚

午親成奏四川教匪徐添德侵擾達州東鄉命總兵朱射斗等勦之二月癸酉上御經筵江南豐汛復報合龍戊寅皇后崩奉太上皇帝詣素服七日不摘纓廷臣如之近臣常服不挂珠辛巳叙景安勦擒教匪功晉三等伯戊戌冊諡大行皇后曰孝淑皇后惠齡奏獲匪首劉起等解京誅之三月戊申上謁西陵丁巳還京癸亥以劉墉爲大學士調沈初爲吏部尙書朱珪爲兵部尙書以福長安慶桂爲滿洲都統德楞泰爲漢軍都統巴克坦布慶成奏由應山追賊入豫查明賊首李全王廷詔姚之富均在其內諭令擒捕夏四月壬申設湖南鎮鎮總兵官改保靖土縣爲流官辛巳追贈侍郎奉寬太師禮部尙書上受書師也五月戊辰上奉太上皇帝避暑木蘭己巳惠齡奏教匪姚之富等由白馬石搶渡漢江入川詔罷總統慶成恒瑞等各降官以宜綿爲總統明亮德楞泰爲幫辦六月癸酉勒保奏勦辦南籠種苗迭克水烟坪卡子河等處得旨亟將苗首仙姑等擒獲閏六月庚子吉慶奏克西隆州亞稿苗寨丙午勒保奏進克普坪槍斃匪首解南籠圍詔獎紳民堅守危城深明大義改南籠府爲興義府勒

保續報解黃草壩圍滇黔路通壬戌軍機章京吳熊光戴衢亨均加三品卿銜
與侍郎傅森一體在軍機大臣上學習行走秋七月己巳永定河決己卯命喀
什噶爾英吉沙爾二回城儲糧備荒癸未郡統巴克坦布卒於軍乙酉免四川
運送軍糈奉節六州縣明年額賦八月甲辰永定河合龍丙辰范宜恒卒調沈
初爲戶部尙書紀昀爲禮部尙書己未大學士誠謀英勇公阿桂卒丙寅上奉
太上皇帝還京九月戊辰勒保奏攻克种苗賊巢獲賊首王囊仙等解京誅之
封勒保三等侯丁丑上臨奠故大學士阿桂甲申以蘇凌阿爲大學士李奉翰
爲兩江總督庚寅詔宜綿勒保秦承恩景安等分募鄉勇入伍勦賊癸巳詔曰
聞賊每逼平民入夥迎拒官軍官軍報捷所稱殺賊多係平民非真賊也故日
久無功領兵大員尙其設法解散勿令玉石俱焚甲午以湖北恩施利川四川
奉節士民奮勇殺賊再免一年錢糧冬十月戊戌明亮德楞泰請廣修民堡以
削賊勢詔斥其迂緩丙辰乾清宮交泰殿災辛酉命勒保總統四川軍務十一
月丙寅朔子陣亡散秩大臣佛柱護軍統領阿爾薩朗世職十二月戊申以康

基田爲江南河道總督司馬駒爲東河河道總督子陣亡總兵明安圖副將甘攀桂伊薩納等世職甲子給祭太廟是歲免順天湖廣陝西雲南甘肅等省五十七州縣災賦有差朝鮮琉球暹羅入貢

三年戊午春正月庚午以梁肯堂爲兵部尙書胡季堂爲直隸總督甲申調勒保爲四川總督乙丑額勒登保奏獲賊首覃加耀上責其遲延奪額勒登保爵職並以疏防奪明亮德楞泰爵職舒亮穆克登阿職籍其家均隨軍自効二月丁未上釋奠文廟臨雍講學以鄂奇泰爲黑龍江將軍慶霖爲江甯將軍辛亥柯藩烏爾圖納遜坐縱賊渡漢入楚褫職壬子以吳省欽爲左都御史乙卯命內閣學士那彥成在軍機處學習行走三月丁丑德楞泰奏追勦賊首齊王氏姚之富投崖死予明亮副都統銜己丑以勦賊遲延褫觀成劉君輔職以富成爲成都將軍夏五月丙寅免福建全省遠年逋賦己巳截留江西漕糧接賑山東曹縣等十三州縣被水災民甲戌上奉太上皇帝避暑木蘭六月己酉以勦賊遲延盡奪德楞泰爵職予副都統銜自効甲寅雲貴總督三等男鄂輝

卒秋七月庚午富楞泰卒以德格楞貴爲寧夏將軍以兩停秋餉八月以獲教匪王三槐功晉勅保及和珅公爵福長安侯爵己酉張誠基奏江西寧州教匪作亂勦平之九月癸亥上奉太上皇帝還京己卯祀明總制袁崇煥於賢良祠冬十月庚子新建乾清宮交泰殿成十一月丁亥左都御史舒常卒十二月乙巳惠齡奏獲賊首羅其清羅其書戊午禘祭太廟是歲免陝西貴州等省四十八廳州縣災賦有差朝鮮琉球暹羅入貢

四年春正月壬戌太上皇帝崩上始親政丁卯大學士和珅有罪及尙書福長安俱下獄鞫訊晉儀郡王永璇親王貝勒永璘爲慶郡王綿億封履郡王奕綸奕紳在上書房讀書綿志等各封賞有差詔中外陳奏直達朕前不許副封關會軍機處命成親王永理大學士董誥尙書慶桂在軍機處行走沈初免直成親王永理管戶部丁丑和珅賜死於獄福長安論斬己卯特詔申明軍紀命勒保爲經略明亮額勒登保爲參贊并查詢劉清居官具實保奏吳省欽免以劉權之爲左都御史以保寧爲大學士仍管伊犁將軍慶桂協辦大學士書麟爲

吏部尚書松筠爲戶部尚書敘斬賊首冉文儒功獎敘惠齡德楞泰丙戌宜綿解任以恒瑞爲陝甘總督丁亥贈原任御史曹錫寶副都御史蔭一子召前內閣學士尹壯圖來京二月己丑以松筠爲陝甘總督布彥達資爲戶部尚書辛卯詔曰自教匪滋事以來迫脅良民焚毀田舍民非甘心從賊欲逃無歸歸亦無食亟宜招撫解散而非空言所能收效應如何緩輯安插令勒保詢之劉清及其他良吏籌議良法俾可施行速具以聞甲午弛私售和闕王禁辛丑秦承恩以貽誤軍事褫職逮問李奉翰卒以費瀉爲兩江總督乙巳復宗室鄉會試例增部院郎官宗室額缺壬子釋回徐述夔王錫侯子孫緣坐發遣者丁巳銖用故大學士朱軾孫嘉淦子孫三月己未朔蘇凌阿免以慶桂爲大學士成德爲刑部尚書傅森爲左都御史庚申戶部尚書沈初卒以范建中爲戶部尚書癸亥以書麟爲閩浙總督協辦大學士甲子調慶霖爲福州將軍福昌爲江甯將軍戊辰許直省道員密摺上奏庚午解景安任以倭什布爲湖廣總督吳熊光爲河南巡撫丙子額勒登保奏勦滅教匪蕭占國張長更上嘉之子二等男

敘獎裨將朱射斗楊遇春等戊寅定侍衛軍政壬午追贈皇四兄履端郡王永
城爲親王皇七兄悼敏皇子永琮爲哲親王皇十二兄永璣爲貝勒癸未勒保
奏勦滅教匪冷天祿得旨旬日之內連剿三酋深爲可嘉額勒登保首一等男
免河南被匪之鄧州二十州縣新舊額賦甘肅布政使廣厚奏勦斃賊目張世
龍夏四月己丑朔欽天監言四月朔日日月合璧五星聯珠上曰躔度偶逢兵
戈未息何足言瑞予尹壯圖給事中准回籍養親內申恭上大行皇帝尊諡禮
成頒詔覃恩丁酉免陝西被賊之孝義等三十五廳州縣新舊額賦己亥免四
川被賊之奉節等三十六廳州縣新舊額賦辛酉詔遵奉皇考勅旨於庚申辛
酉舉鄉會恩科癸丑賜姚文田等二百二十人進士及第出身有差丙辰以慶
成爲成都將軍五月戊午朔停本年秋決甲子免湖北被賊之孝感等四十七
州縣衛新舊額賦庚午江蘭能以初彭齡爲雲南巡撫庚辰以傅森爲兵部尙
書阿迪斯爲左都御史辛巳克勤郡王恒謹以不謹削爵甲申以董誥爲大學
士丁亥勅費淳訪劾貪吏詔免伯德爾格回民增納金錢及葡萄折價六月己

卅增設步軍統領左右翼總兵官庚寅詔曰朕聞湖北隨州未被賊擾因民人掘溝塋山足資捍禦民間卹堡儘可照辦勒保松筠吳熊光即曉諭百姓知之辛卯吳熊光吳璵請加徵河工稽料運費銀得旨申飭下部議處庚戌卹陝西陣亡總兵官保興等世職秋七月辛酉調山西兵三千赴湖北盛京兵三千額勒亨額統之赴四川勦賊癸亥勒保奏獲賊首包正洪子朱射斗騎都尉世職壬申經略勒保以玩誤軍務奪職逮問以明亮爲經略魁倫爲四川總督乙亥創景安伯爵遣戍伊犁免甘肅被賊隴西等四十八州縣新舊額賦辛巳停中秋節貢八月己丑富俊免以興奎爲烏魯木齊都統壬辰調盛京兵二千吉林黑龍江兵各一千赴湖北勦賊癸巳以長麟爲雲貴總督乙未勒保奏德楞泰生擒賊目巽文玉給騎都尉世職癸卯罷明亮經略命額勒登保以都統銜爲經略乙巳命修撰趙文楷中書李鼎元卅封琉球國王尙溫己酉慶成永保以督軍不力逮問命那彥成往陝西督辦癸丑編修洪亮吉致書成親王私論國政遣戍伊犁九月丙辰朔卹陣亡貴州副將孫大猷世職丙寅怡親王永琅薨

庚午大行梓宮發引上恭送啟鑾庚午葬高宗純皇帝於裕陵癸酉還京甲戌高宗純皇帝孝賢純皇后孝儀純皇后升祔太廟頒詔覃恩辛巳故湖廣總督畢沅坐濫川軍需創世職奪廢官壬午明亮以勦賊不力罷參贊禡都統予副都統勦賊冬十月壬辰調朱珪爲戶部尙書劉權之爲吏部尙書范建中爲左都御史丁酉明亮奏獲賊首張漢潮湖北道員胡齊崙以侵盜錢糧處斬壬寅德楞泰奏獲賊首高均德高二子德楞泰二等男丁未成親王永瑄免值軍機處命傅森仍爲軍機大臣辛亥命廷臣保舉賢良壬子勒保論斬解京監候十一月甲子故超勇公海蘭察子公安祿於四川勦賊陣亡詔優卹之名其子恩特赫默扎拉芬襲超勇公癸酉免直隸積年逋賦戊寅興肇慶成以帶兵不力遣戍賞額勒登額銀一萬兩德楞泰銀五千兩庚辰冬至祀天於圓丘奉高宗純皇帝配享頒詔覃恩十二月壬辰漕運總督蔣兆奎以率請加賦濟運罷卹陣亡副將丁有成德亮等世職甲午福壽以殺降報捷景安以縱賊殃民俱褫職逮問丙申額勒登保奏獲教匪王登廷辛丑姜晟奏獲湖南苗匪吳陳受得

旨嘉獎加太子少保壬子哈祭太廟是歲免河南湖北被兵六十七州縣新舊額賦徵兵經過直隸河南湖北田賦又除江蘇湖北各一縣坍田額賦吉林三姓黑龍江雲南石屏州災賦普免天下積年逋賦朝鮮暹羅入貢

五年庚申春正月甲寅朔上謁陵丙辰詣裕陵行初期祭禮庚申上還京命額勒登保勦辦陝西教匪德楞泰魁倫勦辦四川教匪辛酉以松筠爲伊犁將軍仍留陝西勦賊調長麟爲陝甘總督以玉德爲閩浙總督阮元爲江蘇巡撫壬戌詔清查庫欸從容彌補勿以嚴急而致累民金士松卒以張若淳爲兵部尙書辛未祈穀於上帝奉高宗純皇帝配享解倭什布任以姜晟爲湖廣總督移松筠勦湖北賊戊寅以景燿爲黑龍江將軍二月丁亥命那彥成參贊甘肅軍務辛卯以汪承霈爲左都御史癸巳勅新疆鑄乾隆錢壬寅卹四川陣亡副將關聯陞等世職丁未追論縱賊諸臣秦承恩宜綿戍伊犁庚戌予告大學士蔡新卒三月庚申上謁陵辛酉解七十五任逮京治罪甲子清明節上行敷土禮乙丑阿迪斯以擁兵玩誤逮問起勒保護成都將軍丁卯上幸南苑德楞泰奏

截勦渡江教匪獲匪首冉添元等三子壬申上謁西陵乙亥還京辛巳甄錄
賢良祠大臣後裔以縱賊渡嘉陵江復過潼河奪魁倫職逮問以勒保署四川
總督起明亮藍翎侍衛從軍夏四月癸未朔日有食之乙酉阿迪斯遣戍伊犁
以德楞泰爲成都將軍庚子雲南猺夷平加書麟太子太保閏四月甲寅命刑
部查久禁官犯及禁錮子孫與久戍者寬減之內午上步禱祈雨乙卯釋洪亮
吉回籍丙辰釋安南人黎侗等於獄安置火器營給月餼是日雨丙寅卹四川
陣亡提督達三泰世職戊辰以那彥成不任戎務罷直軍機處召回京五月壬
戌朔夏至祀地於方澤奉高宗純皇帝配享己丑經略額勒登保以勦辦匪目
劉允恭等功晉三等子丙午那彥成到京奏對無狀降爲翰林院侍講六月壬
戌額勒登保奏獲賊首楊開甲丁卯以張若淳爲刑部尙書汪承霈爲兵部尙
書馮光熊爲左都御史甲戌賜魁倫自盡戊其子扎拉芬於伊犁秋七月辛卯
命右翼總兵長齡統吉林黑龍江兵赴湖北協勦教匪琅玕奏青苗楊文泰作
亂勦平之馬慧裕奏獲傳教首犯劉之協解京誅之內申禮部尙書德明卒以

達椿爲禮部尙書己酉額勒登保奏獲賊目陳傑八月丙辰固原提督王文雄
勦賊陣亡子三等子九月壬午上謁東陵戊子還京丁未卹四川陣亡副將李
錫命世職冬十月戊辰胡季堂卒以姜晟爲直隸總督書麟爲湖廣總督琅玕
爲雲貴總督十一月乙酉睿親王溥穎薨己亥卹陣亡革職將軍富成等世職
十二月甲寅陝西教匪徐添德竄湖北湖北教匪冉學勝竄陝西降責德楞泰
勒保等丁巳德楞泰奏獲教匪楊開第等丙子給祭太廟是歲免順天江蘇四
川雲南甘肅等省七十廳州縣災賦及兵差經過坍田額賦各有差朝鮮琉球
入貢

六年辛酉春正月壬午以傅森爲戶部尙書明安爲步軍統領辛卯遣少卿窩
星阿裘行簡犒額勒登保德楞泰軍丁酉德楞泰以勦山陽教匪功復一等子
甲辰德楞泰奏獲賊首高二王儒乙巳勒保奏獲黃藍白三號賊目徐萬富等
二月乙卯勒保奏獲賊首王士虎丙辰書麟奏明亮獲賊目卜興昂戊午賜賢
良後裔尙書魏象樞六世孫煜尙書楊名時曾孫景曾巡撫徐士林孫從旭舉

人戊辰上謁陵行敷土禮壬申上還京改湖廣提督爲湖南提督置湖北提督
駐襄陽改襄陽鎮總兵爲鄖陽鎮總兵癸酉傅森卒以成德爲戶部尙書軍機
大臣乙亥額勒登保奏獲賊首王廷詔三月庚辰詔被賊裹脅匪徒多係良民
凡投出者悉貸其死軍前大臣仰體朕意廣爲宣示務使周知卹陣亡總兵多
爾濟扎布李紹祖等世職丁酉賜賢良後裔大學士李光地四世孫維翰尙書
湯斌四世孫念曾舉人巡撫傅宏烈六世孫縣丞徵璫知縣己亥詔朕將謁陵
春苗暢發令大臣監護民田勿許踐踏禾苗敘江西士民協勦教匪劉聯登功
改西甯州爲義甯州辛丑上謁陵乙巳行釋服禮夏四月丁未朔上還京己未
以四川民人輸資急公免遂甯等八十六廳州縣明年額賦辛酉冊立皇后鈕
祜祿氏壬戌協辦大學士湖廣總督書麟卒以吳熊光爲湖廣總督德楞泰奏
獲賊首張允壽丙寅以獲王廷詔高二馬五功晉額勒登保二等子楊遇春騎
都尉戊辰以兩廣總督吉慶協辦大學士辛未賜顧皋等二百七十五人進士
及第出身有差五月己卯賜賢良後裔大學士王熙曾孫元洪舉人甲申上祭

文昌廟始命列入祀典乙酉卹四川陣亡總兵朱射斗視提督予世職丙戌命總兵官輪班入覲奉天府丞視學政三年更任乙巳以額勒登保爲理藩院尙書六月壬子大雨永定河決分遣卿員撫恤被水災民以水災停本年秋獵姜晟免發永定河効力起陳大文署直隸總督丙辰復兩西安將軍恆瑞卒辛未上步禱社稷壇祈晴是日晴勒保奏東鄉青藍號匪悉數殲除七月庚辰特發在京兵丁口糧一月甲申命那彥寶巴寧阿修築永定河工勒保奏獲匪目徐添壽王登高戊戌賑熱河水災八月丁巳額勒登保奏獲匪首王士虎冉添泗勒保奏七十五獲賊目劉清選湯步武等甲子勒保奏獲賊首冉學勝等封三等男九月己丑續修大清會典冬十月丙午永定河合龍癸丑額勒登保奏獲賊首辛斗德楞泰奏斃賊首龍紹周癸亥詔甄敘川陝軍勞晉額勒登保三等伯德楞泰二等伯賽沖阿騎都尉溫春雲騎尉十一月甲申貴州巡撫伊桑阿以驕黷欺罔賜死癸巳詔曰軍務卽日告蒞安插鄉勇爲善後要事其通籌詳議以聞乙未額勒登保奏獲賊首高見奇戊戌七十五以縱賊奪職逮問己亥

升四川達州爲綏定府太平營爲太平協十二月癸卯朔慶成奏獲苟文明股匪丁未詔曰前奉皇考特旨查攷本朝殉節諸臣未得世職者業經查出一百四十餘員補給恩騎尉世職茲又續查得九百九十餘員開單呈覽均係抗節效忠之臣其子孫俱即給與恩騎尉世職支給俸饌除投標當差外有願應試者准作文武生員一體應試癸亥詔獎劉清特授四川建昌道壬申額勒登保奏勦辦通江賊匪斃匪目苟朝獻辛未給祭太廟是歲免直隸山西浙江安徽四川雲南甘肅等省二百三十一廳州縣衛額賦有差朝鮮暹羅入貢

七年壬戌春正月癸酉朔上謁裕陵行三期祭禮賜所過貧民棉衣甲戌定祭社稷壇用上戊戌寅上還京壬午以松筠爲伊犁將軍甲午額勒登保奏獲首逆辛聰餘黨悉平吳熊光奏獲匪首張允壽子得貴撲滅藍號賊股明安以貪黷褫職遣戍伊犁以祿康爲步軍統領解刑部尙書額勒登保以疏防苟文明竄渡漢江降男爵庚子上御經筵二月癸卯以苟文明竄南山老林飭領兵大臣堵剿地方官嚴密查拏勿令蔓延丁未釋奠先師孔子壬戌優卹陣亡副將

韓自昌與其弟副將韓加業飭地方官爲建雙烈祠賜其母銀三百兩內寅額勒登保奏劉清獲賊首李彬辛文加按察使銜花翎三月癸酉勒保奏獲賊首張添倫魏學盛陳國珠丁丑德楞奏奏獲匪首龔其堯李世漢李國珍餘黨悉平壬午上謁秦陵庚寅還京壬辰成德卒以祿康爲戶部尙書夏四月戊申以顏檢爲直隸總督乙丑賜吳廷琛等二百四十八人進士及第出身有差丁卯慶成奏獲賊首魏洪升張喜白庸五月己卯睿親王寶恩薨琅玕奏獲探匪首逆腊者布壬午勒保奏獲匪首鹿向瑤徐添陪張思從甲午慶成奏搜捕餘匪獲康二麻張昌元加太子太保六月己酉德楞奏奏教匪樊人傑溺水死俘其妻孥餘匪殲盡晉封三等侯甲寅命劉權之德瑛爲軍機大臣乙卯達椿卒以長麟爲禮部尙書命保審管理兵部以祿康恭阿拉爲漢軍統都秋七月辛未勒保奏勦殲黃白青藍四號賊匪晉一等男庚辰陝西貢生何泰條陳黜奢崇儉挽回風氣得旨可採賞大綬二匹甲申大學士王杰致仕加太子太傅在籍食俸戊子秋彌木蘭癸巳詔曰廣東博羅監犯越獄一案經朕硃諭查詢始

據該督撫據實陳奏則天下事之不發覺者多矣殊堪感歎更深懷畏除分別懲治外尙其大法小廉用副激敘官方至意以興奎爲西安將軍明亮爲烏魯木齊都統甲午額勒登保奏獲逆首苟文明諭適到木蘭便聞捷音敘匪起事諸犯只餘此賊今旣授首不難肅清額勒登保曾一等伯楊遇春以下各優予敘資張若淳卒以熊枚爲刑部尙書轉汪承霈爲左都御史戴衢亨爲兵部尙書八月己亥朔日有食之詔曰月朔日食月望月食天象示儆兢惕時深朕躬有闕失歟勦捕邪匪餘孽未盡其應靖以兵威或迪以德化歟政事有不便於民者或一時行之日久則滋流弊歟其各謹言無隱至月食修刑惟當於明法勅罰力求詳慎所當與內外諸臣交勉焉以朱珪協辦大學士癸卯以嵇承志爲東河河道總督以劉清爲四川按察使乙卯上行圍越南農耐阮福映率屬內附繳前藩勅印詔許其入貢辛酉德楞泰奏獲賊首蒲添寶九月庚辰上遇鑾戊子上謁陵辛卯還京丙申吳熊光奏斃黃號匪首唐明萬冬十月己酉杭州將軍弘豐卒以張承勳爲杭州將軍壬子勒保奏獲白號賊首張簡藍號賊

首湯思蛟丁巳德楞泰奏斃賊首戴四獲賊目趙鑑十一月戊辰朔德楞泰奏
獲賊首陳傳學庚午詔以吉慶辦理博維會匪奏報不實免協辦大學士命那
彥成查辦尋解總督勒瑚圖理署理丙戌額勒登保奏獲賊首景英哲三等侯
十二月戊戌朔安徽宿州盜匪作亂費淳等討平之癸丑詔額勒登保德楞泰
勒保惠齡吳熊光會報川陝楚教匪蕩平封額勒登保德楞泰一等侯勒保一
等伯明亮一等男賽沖阿楊遇春以次封賚并推恩成親王永理等軍機大臣
慶桂董誥等乙丑祀祭太廟是歲免直隸陝西江西四川等省五十六廳州縣
災賦除江蘇福建山東十縣衛圻田額賦朝鮮入貢

八年癸亥春正月庚午以倭什布爲兩廣總督丁丑命伊犁廣開民田張誠基
以勦辦義寧州土匪陳奏不實論絞乙酉賜貧民棉衣甲午上御經筵二月己
未上謁東陵閏二月戊寅上還駐圓明園乙酉還宮入順貞門奸人陳德突出
犯駕定親王綿恩額駙拉旺多爾濟及丹巴多爾濟等擒獲之交廷臣嚴鞫獎
賚綿恩等有差丁亥祀先農上親耕藉田己丑詔曰陳德之事視如獬犬不必

窮鞠所慚思者德化未昭始有此警予之事耳即按律定擬是日陳德及其二子伏誅予告大學士王杰陛辭賜玉鳩杖御書詩章馳驛回籍庚寅嚴申門禁三月丙申御試翰林甲辰甘肅提督穆克登布以勦捕餘匪陣亡贈二等男卹湖北陣亡總兵王懋賞等世職庚申皇后行躬桑禮四月丙戌上祈雨丁亥兩五月乙未建宗室覺羅住房癸丑以富俊爲吉林將軍六月戊子尙書彭元瑞乞休允之仍總裁高宗實錄以費淳爲兵部尙書陳大文爲兩江總督己丑封阮福映爲越南國王秋七月乙巳以那彥成爲禮部尙書丁未以三省餘匪肅清優敘額勒登保德楞泰及軍機大臣壬申上巡幸木蘭八月壬午調富俊爲盛京將軍以停止行圍迴鑾辛卯上還京九月戊申致仕尙書前協辦大學士彭元瑞卒冬十月壬申琅玕奏獲首犯恒乍綱獾獾匪平癸未葬孝淑皇后於山陵十一月戊戌朱珪等請磨敬一亭明代碑文上不許十二月己丑哈祭太廟是歲免直隸山東河南江蘇安徽陝西湖北四川雲南甘肅等省四百十八廳州縣衛災賦逋賦有差朝鮮越南入貢

九年甲子春正月丁未調興奎爲寧夏將軍賽冲阿爲西安將軍二月壬戌上御經筵癸亥上臨幸翰林院賜宴賦柏梁體詩戊子上謁東陵三月壬辰幸盤山壬寅詣明陵奠酒長陵甲辰上還京夏四月己巳上閱健銳營兵丙子召嵇承志來京以徐端署河東河道總督五月甲午上所雨黑龍潭丁酉雨丁未鐵保奏進八旗詩一百三十四卷賜名熙朝雅頌集六月壬戌玉德等奏海盜蔡牽擾及鹿耳門突入汕木寨得旨追擒務獲戊辰以祿康協辦大學士明亮爲工部尙書長麟爲刑部尙書費淳爲吏部尙書德瑛罷直軍機處以邢彥成英和爲軍機大臣乙亥惠齡卒以邢彥成爲陝甘總督卹捕海盜陣亡總兵胡振聲贈提督予世職錄用其子秋七月丙午上巡幸木蘭庚子初彭齡以誣參吳熊光褫職癸丑以歲周浹甲停本年決囚八月己未清查湖北濫支軍需追罰福康安和琳之子並畢沅等丁丑上迴鑾謁陵九月庚寅上幸南苑行圍辛卯以搜捕三省餘匪淨盡甄敘額勒登保以次有差甲午上還京冬十月癸酉廣西武緣知縣孫廷標匿傷縱兇特旨處絞臬司公義遣戍烏魯木齊己卯上御

傳敘殿賜宴宗室諸王十一月戊申調那彥成爲兩廣總督倭什布爲陝甘總督十二月丁卯調徐端爲江南河道總督庚辰大學士劉塘卒甲申給祭太廟是歲免直隸湖北四川等省二十一廳州縣災賦有差朝鮮暹羅入貢

十年乙丑春正月乙未予告大學士王杰因賜壽來京卒優詔卹贈辛亥以朱珪爲大學士紀昀協辦大學士以鐵保爲兩江總督詔內務府大臣嚴行約束內監稽其出入纂入宮史著爲令二月己未上御經筵己巳禮親王永恩薨子昭槲襲協辦大學士紀昀卒調劉權之禮部尙書協辦大學士三月己丑上幸南苑行圍己亥上謁泰陵丙午迴鑾閱健銳營兵戊申上還京以弘康爲廣州將軍夏四月辛巳御史蔡維鈺疏請查禁西洋人刻書傳教得旨一體查禁戊寅賜彭淩等二百四十三人進士及第出身有差五月甲申朔詔內務府大臣管理西洋堂未能嚴切稽查任令傳教下部議處其經卷檢查銷毀習教之侈濶等罪之戊申追敘削平教匪清野功加勒保太子太保明亮一等子六月庚申顏杓以失察虧帑黜免調吳熊光爲直隸總督百齡爲湖廣總督丁丑永定

河決閏六月癸未劉權之免以費淳協辦大學士秦承恩爲左都御史戊戌永定河合龍乙巳以清安泰爲浙江巡撫秋七月壬辰上詣盛京謁陵啟鑾八月丙戌上祭北鎮廟乙未上謁永陵丙申行大饗禮閱吉林官兵射庚子上謁福陵行大饗禮辛丑上謁昭陵行大饗禮臨奠克勤郡王岳託武勳王揚古利宏毅公額亦都直義公費英東墓上駐蹕盛京詣寶冊前行禮甲辰詣天壇地壇行禮乙巳上御崇政殿受賀御前大臣三等公額勒登保卒建祠京師以慶成爲成都將軍丙午上御大政殿賜扈從王大臣及朝鮮陪臣宴御製盛京頌八章賜朝鮮國王李松御書匾額戊申上迴鑾九月己巳上謁東陵壬申還京丙子臨奠額勒登保冬十月甲午命戴均元馳赴南河勘工丙申英吉利國王入貢賜勅竝文綺辛丑那彥成免調吳熊光爲兩廣總督裘行簡署直隸總督癸卯以賽沖阿爲廣州將軍十一月丙辰百齡免以全保爲湖廣總督己未以慶溥爲湖北提督十二月丁未祫祭太廟是歲免直隸山西陝西等省三十四州縣災賦及兩淮十一場額課有差會計天下民數三萬三千二百一十八萬一

千四百三名口穀數二千九百四十一萬一千九百九十九石七升三合二勺
朝鮮英吉利入貢

十一年丙寅春正月壬子海盜蔡掌陷鳳山縣命玉德勦辦調廣州將軍賽沖
阿馳往督辦丙子那彥成以在署演戲濫收海盜奪職戍伊犁二月癸未上御
經筵辛卯上謁東陵甲辰上幸南苑行圍戊申還京三月己丑台灣總兵愛新
泰克復鳳山縣予世職夏四月辛卯上閱健銳營兵癸巳李亨特免以吳啟爲
河東河道總督丙申續編皇清文類五月丙寅玉德能以阿林保爲閩浙總督
六月戊寅調姜晟爲工部尙書秦承恩爲刑部尙書庚辰慶成以奏對失實削
職戍黑龍江以特清額爲成都將軍庚寅以戴均元爲江南河道總督徐端爲
副總河庚子命德楞泰管理兵部秋七月癸亥寄陝鎮新兵陳逢順糾黨戕官
陷洋縣擾及寧羗命德楞泰統巴圖魯侍衛索倫兵勦之丁卯上巡幸木蘭八
月庚寅上行圍甲辰李長庚奏勦殲蔡牽匪黨多名蔡牽逸九月乙巳發巴圖
魯侍衛索倫等兵赴陝西癸丑諭直隸失察侵帑案顏檢成烏魯木齊降姜晟

陳大文熊枚四品京堂起初彭齡爲安徽巡撫庚申起劉權之爲左都御史癸亥上還京冬十月丁丑德楞泰奏勦平洋縣叛兵甲申以全保爲陝甘總督汪志伊爲湖廣總督曹振鏞爲工部尙書丁亥以溫承惠爲直隸總督起阮元署福建巡撫以病辭調張師誠爲福建巡撫金光悌爲江西巡撫癸巳以和寧爲烏魯木齊都統大學士保寧乞休優詔致仕予食公俸十一月庚申以祿康爲大學士長麟協辦大學士文寧爲步軍統領詔以德楞泰勦辦叛兵寬大受降切責之降楊遇春寧陝鎮總兵楊芳遣戍伊犁即押降兵赴戍十二月戊寅大學士朱珪卒己卯上臨第賜奠庚辰特詔旗民力求節儉辛丑祫祭太廟是歲免直隸四川等省三十五廳州縣災賦有差朝鮮琉球入貢

十二年丁卯春正月丙午以費淳爲大學士戴衢亨協辦大學士癸亥詔曰從前勦辦邪匪鄉勇過多迨事平遣散爲難多令入伍充兵今陝之害陝川之緩定迭報新兵滋事隨時勦平此等犷悍之徒必須隨時懲創勿令別生事端戊辰陝西瓦石坪新兵滋事討平之二月甲戌上御經筵戊子積拉堪罷創爵以

愍爲荊州將軍壬辰上幸南苑行圍辛亥上謁西陵甲寅還京丁巳高宗實錄
聖訓成辛巳上祈雨甲子雨夏四月丙戌上閱健銳營兵庚子上祈雨五月己
丑雨己未以長齡爲陝甘總督薩彬圖爲漕運總督丙寅增定河工料價雍正
以來常年工費率六十萬自此馴增百六十萬六月乙未禁督撫幕友朦保入
官秋七月乙巳命編修齊鯤給事中費錫章冊封琉球國王戊午上巡幸木蘭
八月乙酉上行圍九月丙午上還駐木蘭邁羅私招商人貿易降勅訓止之辛
亥上迴鑾甲寅閱古北口兵丙辰還京冬十月乙未令武鄉會試內場罷策論
默寫武經十一月辛丑塞陳家浦壩口導黃河由故道入海十二月癸未調清
安泰爲河南巡撫以阮元爲浙江巡撫癸巳禘祭太廟是歲免直隸江蘇四川
甘肅等省四十七州縣災賦鹽課除江蘇福建山西五縣水冲坍田額賦朝鮮
琉球南掌入貢

十三年戊辰春正月戊午浙江提督李長庚追擊海盜卒於軍贈伯爵以部將
王得祿爲浙江提督二月丁卯命皇次子釋奠先師孔子庚午上御經筵丙子

予告大學士保寧卒戊寅特詔獎敘湖南辰沅永靖道傅鼎加按察使銜三月
庚子上謁東陵壬午上巡閱天津長隄丙辰以徐端爲南河河道總督己未上
閱天津鎮兵丙寅上幸南苑行圍命長麟戴衢亨勘察南河夏四月戊辰上還
京辛卯賜吳信中等二百六十一人進士及第出身有差五月癸卯長麟戴衢
亨奏查勘河工請用一百三十餘歲張姓老民指出靳輔舊於天然閘東建閘
二座驗有壩基擬請修復得旨照准賞老民銀緞庚申修閘里孔廟閏五月壬
午湖南提督仙鶴翎以表賀生皇長孫失辭罷六月甲辰御製耕織圖詩刊於
授時通考乙巳秦承恩免以吳璥爲刑部尙書秋七月庚辰上巡幸木蘭八月
己酉上行圍甲寅卹廣東捕盜被戕總兵林國良世職九月己卯上還京冬十
月癸巳朔日有食之十一月壬午吳熊光罷以永保爲兩廣總督庚寅以興肇
爲杭州將軍十二月壬辰朔命皇次子詣大高殿祈雪己亥上所雪乙巳雪以
周興岱爲左都御史己未祫祭太廟是歲免直隸四川等省十三廳州縣災賦
逋賦除直隸江蘇浙江福建雲南甘肅等省十一廳州縣沖田額賦浙江福建

二場埤地額課朝鮮琉球入貢

十四年己巳春正月辛酉朔上五旬萬壽節頒詔覃恩加封儀親王永璇子綿志成親王永璫孫奕綸爲貝勒加恩藩臣廷臣有差丁卯以百齡爲兩廣總督壬申廣興有罪處斬子蘊秀戍吉林籍其家緣以降黜者多人長齡戍伊犁以和寧爲陝甘總督二月壬辰上御經筵壬寅上製崇儉詩義利辨頒示廷臣丁未上謁東陵丁巳福建總兵許松年殲斃海盜朱潰子世職己未上還京三月癸亥上謁西陵丙子還京西安將軍三等公德楞泰卒己卯松筠奏遣戍叛兵蒲大芳馬友元等一百餘人在戍不法均分起誅訖上責其濫殺奪職以晉昌爲伊犁將軍興肇爲荊州將軍夏四月甲寅賜洪瑩等二百四十一人進士及第出身有差吳熊光戍伊犁百齡劾之也孫玉庭罷五月丁丑特詔切責廷臣泄沓戊寅巡漕御史英綸以貪婪卑污處絞六月乙未倉塲黑檔盜米事發責黜歷任侍郎有差丁未以松筠爲陝甘總督秋七月戊辰詔停本年秋決江蘇查賑知縣李毓昌爲山陽知縣王仲漢毒斃下部鞠實王仲漢立斬知府王穀

立絞家丁李祥等均極刑總督鐵保奪職遣戍巡撫汪日章奪職上製憫忠詩賜其嗣子李希佐舉人控訴得申武生李清泰武舉調阿林保爲兩江總督以方維甸爲閩浙總督壬申給事中花杰以參劾軍機大臣戴衢亨徇私不得直降官乙亥詔曰朕痼癥在抱每直省報災無不立霈恩施多方賑恤乃督撫不加查察致有冒賑之事如近日寶坻山陽二案竟謀斃持正委員豈可不加以懲治非有所靳惜也御史周鉞因請報災之處另委道府詳查不知道府又安盡賢能見在寶坻一案該管東路同知歸恩燕卽向索銀三千兩山陽一案該管知府王穀收銀二千兩設遇此類道府又可信乎道府亦不能徧歷村莊仍委之委員益不足憑矣其要惟在督撫得人耳至若以查災爲難因而相率諱災則其咎更重矣將此通諭知之壬午上巡幸木蘭八月庚戌浙江學政侍郎劉鳳誥以監臨舞弊褫職戍黑龍江巡撫阮元以徇隱奪職九月己未以慶成爲福州將軍庚申上還京己巳張師誠疏報王得祿邱良功合剿海盜蔡牽緊逼賊船衝斷船尾蔡牽落海淹斃予王得祿子爵邱良功男爵壬申百齡疏請

粵鹽改陸運從之冬十月戊子朔癸巳上萬壽節御太和殿受賀賜宴庚戌阿林保疏請漕糧加折收納上嚴斥之十一月壬辰以松筠爲兩江總督那彥成爲陝甘總督十二月戊戌以失察工部書吏冒領戶部內務府官銀祿康費淳以次降黜甲寅給祭太廟是歲免直隸江蘇等省二十四州縣災賦除順天文安窪地浙江錢清塲湖南茶州圯地田賦朝鮮琉球暹羅越南南掌入貢

十五年丙子以劉權之爲協辦大學士二月己丑上御經筵壬辰長麟以疾免以瑚圖禮爲刑部尙書托津爲工部尙書丙申召勒保來京以常明爲四川總督丙子詔以鴉片烟戕生通飭督撫斷其來源三月甲子上謁東陵戊寅上幸南苑行圍癸未還京夏四月丁酉上閱健銳營兵五月癸亥勒保以不奏匿名書罷大學士降工部尙書復以祿康爲大學士明亮協辦大學士以戴衡亨爲大學士費淳爲工部尙書六月戊戌改熱河副都統爲都統以積拉堪補授壬子百齡以擒解海盜烏石二功予輕車都尉世職秋七月甲寅永定河溢壬申上巡幸木蘭辛巳以徐端爲南河河道總督修改雲梯關海口命馬慧裕督辦

八月戊戌上行圍壬子以皂保爲蒙古都統設廣東水師提督陽江鎮水師總兵九月己未以汪志伊爲閩浙總督馬慧裕爲湖廣總督恭阿拉爲工部尙書甲子永定河漫口合龍己巳上還京乙亥增河南稽料價銀冬十月甲午江南高堰山旰兩隄決壩丁酉定部院直日例十一月壬戌前吉林將軍秀林以盜用侵銀賜死十二月丙申廣西疏報壽民藍祥一百四十二歲特賜御製詩章御書匾額六品頂戴銀五十兩丁酉馬慧裕奏雲梯關大工合龍河歸正道入海得旨嘉獎己亥以陳鳳翔爲江南河道總督壬寅調興肇察哈爾都統己酉給祭太廟是歲免直隸七州縣災賦除江蘇丹徒上海圻田安徽無爲州廢田田賦朝鮮暹羅入貢

十六年辛未春正月戊午以雲梯關馬港新築長堤增設淮海道海安海阜二廳同知癸酉以百齡爲刑部尙書松筠調兩廣總督勒保爲兩江總督二月壬午上御經筵丁亥釋奠先師孔子詔曰朕因連年南河河工糜費至四千餘萬特命托津初彭齡前往查察茲據奏覆查勘工帳銀款出入尙屬相符而工程

未盡堅固此實歷任河臣之咎吳璥徐端俱降革有差在工人員一併斥革其未發銀六十萬并著停發三月丙寅上謁西陵壬午謁陵禮成西巡五臺山乙亥工部尙書費滄卒贈大學士以肅親王永錫爲蒙古都統閏三月庚辰上駐蹕五臺山乙酉上迴鑾丙申上謁堯母陵帝堯廟行禮戊戌上閱直隸綠營兵幸蓮池書院遣官祭明臣楊繼盛祠癸卯上還京夏四月戊申大學士戴衢亨卒甲子上祈雨致仕協辦大學士長麟卒壬申賜蔣立鏞等二百三十七人進士及第出身有差以福慶爲漢軍都統崇祿爲蒙古都統五月辛巳以劉權之爲大學士鄒炳泰協辦大學士劉鐸之兵部尙書丁亥上再詣天神壇祈雨庚寅兩六月壬午明亮以覆奏不實降副都統以松筠爲協辦大學士癸丑祿康以覆奏不實降副都統以勒保爲大學士管理吏部吉綸爲工部尙書步軍統領乙丑湖南按察使傅鼎卒贈巡撫許建專祠秋七月戊寅命光祿寺少卿盧蔭溥入直軍機處加四品卿銜壬辰禁西洋人潛居內地丙申上巡幸木蘭癸丑江南李家樓河決乙巳興肇以老免起貢楚克扎布爲察哈爾都統八月壬

戊上行圍九月己卯建興安大嶺神祠春秋致祀戊子上迴鑾乙未以松筠爲吏部尙書蔣攸銛爲兩廣總督丁酉上謁陵庚子上還京辛丑四川十二支嶺夷向化改土歸流十一月庚子勅改連河邳宿工程復歸河員管理十二月癸丑以和寧爲盛京將軍癸酉給祭太廟是歲免順天江蘇河南等省八州縣災賦除甘肅通賦又除喀什噶什噶爾回莊田賦朝鮮琉球暹羅緬甸入貢

十七年壬申春正月壬午時享太廟命皇次子行禮二月甲辰朔上御經筵三月丙子上謁東陵己丑上幸南苑行圍辛卯以明亮爲西安將軍壬辰上御晒鷹營大閱八旗官兵丙申上還京夏四月甲辰詔曰八旗生齒日繁亟宜廣籌生計朕聞吉林土膏沃衍地廣人稀柳條邊外葭塲移遠其間空曠之地不下千有餘里多屬腹壤流民時有前往耕植應援乾隆年間拉林成案將閒散旗丁送往吉林撥給地畝或耕或佃以資養贍農暇仍可練習騎射以備當差教養兩得其益該將軍等盡心籌畫區分棲止詳度以聞丙辰上閱健銳營兵癸亥護軍統領扎克塔爾卒予銀三百兩五月戊子溫承惠奏灤州拏獲金丹八

卦邪教董懷信等得旨從嚴懲辦六月乙巳移閑散宗室於盛京居住築室給田給銀秋七月戊子上巡幸木蘭八月壬子陳鳳翔以不職免以黎世序爲江南河道總督甲寅以阮元爲漕運總督丙辰上行圍九月戊子上還京甲午慶桂以年老罷以松筠爲軍機大臣冬十月丁卯以恭阿拉爲禮部尙書十一月辛未以景安爲理藩院尙書兼漢軍都統十二月壬子以鐵保爲禮部尙書潘世恩爲工部尙書甲寅以興肇爲江甯將軍是歲免順天奉天直隸河南安徽等省二十七州縣災賦通賦旗租臺灣噶瑪蘭水沖田賦朝鮮暹羅入貢

十八年癸酉春正月乙亥軍機大臣松筠罷爲御前大臣以勒保爲軍機大臣二月庚子上御經筵三月丁丑上幸南苑行圍丙戌上謁西陵丙申上還京夏四月己亥以明亮爲蒙古都統甲寅上祈雨癸亥以富俊爲黑龍江將軍五月庚辰上祈雨壬辰雨六月乙卯賜進書生員鮑廷博舉人庚申以松筠爲伊犁將軍秋七月甲戌申嚴販運鴉片烟律食者并罪之丁丑御史馮大中疏言中外臣工辦事遲延怠緩請旨稽覈上是之壬午上巡幸木蘭八月庚戌上行圍

九月甲子上以陰雨減圍癸酉上迴鑾乙亥河南睢州河溢河南滑縣八卦教匪李文成糾衆謀逆知縣強克捷捕繫獄其黨馮克善牛亮臣陷縣城克捷死之直隸長垣山東曹縣賊黨咸應上命高杞同興防堵溫承惠佩欽差大臣關防勦之召楊遇春統兵北上賊黨徐安懶陷長垣戕知縣趙綸金鄉知縣吳階捕賊崔士俊等戊寅上行次罕髻山是日奸人陳爽數十人突入紫禁城將逼內宮皇次子用槍殪其一人一賊登月華門牆執旗指揮皇次子再用槍擊之墜貝勒綿志續殪其一王大臣率健銳火器營兵入盡捕斬之己卯詔封皇次子爲智親王綿志郡王銜論捕賊功各予獎叙奪吉綸職以英和爲步軍統領庚辰詔曰朕紹承大統不敢暇逸不敢爲虐民之事自川楚教匪平後方期與吾民共享承平之福乃昨九月十五日大內突有非常之事漢唐宋明之所未有朕實惡焉然變起一朝禍積有素當今大患惟在因循怠玩雖經再三誥誡舌敝筆禿終不足以動諸臣之聽朕惟返躬修省耳諸臣願爲忠良即盡心力匡朕之咎正民之志切勿依前尸位益增朕失通諭知之命那彥成爲欽差大

臣勦賊河南以提督楊遇春副都統富僧德總兵楊芳帶兵協勦辛巳首逆林清就擒壬午上還京癸未以松筠曹振鏞爲大學士托津百齡協辦大學士鐵保章煦爲吏部尙書丙戌首逆林清通逆內監劉進亨等伏誅冬十月丙申祖之望免以韓封爲刑部尙書癸卯山東鹽運使劉清大破賊於扈家集侍衛蘇爾慎復定陶曹縣御史張鵬展疏陳百姓不敢出首邪匪由於地方官規避處分不爲受理或反坐誣上是之己酉那彥成奏各路調兵再行進勦上嚴斥之甲寅命托津往督河南軍務桂芳入直軍機處丁巳卹禁城拒賊傷亡侍衛那倫等世職己未祿康裕瑞失察屬人從逆發盛京禁錮辛酉謫降漢軍籍直隸籍之科道官壬戌以明亮爲兵部尙書十一月甲子朔那彥成奏攻克道口賊巢進圍滑城丙寅勅刪減公罪則例壬申通逆都司曹綸伏誅戊子那彥成奏楊芳等攻克司寨山賊寨殲斃首犯李文成十二月丙申命松筠長齡籌議新疆經費丙午那彥成奏攻克滑城賊渠宋元成等伏誅生擒牛亮臣等予那彥成三等男楊遇春等以次獎叙有差命托津留辦長垣賊匪是歲免直隸河南

湖南等省二十六州縣災賦除江蘇河南湖南廢田田賦朝鮮琉球越南暹羅
入貢

十九年甲戌春正月壬午以吳璲爲河東河道總督二月甲午上御經筵乙未
以晉昌爲盛京將軍壬寅成都將軍賽冲阿以勦陝西賊匪苗小一等子三等
男長齡輕車都尉楊遇春管一等男壬子以富俊爲吉林將軍特依順保爲黑
龍江將軍丙辰鐵保免以英和爲吏部尙書奕紹爲漢軍都統以戴均元爲左
都御史閏二月甲子以和寧爲禮部尙書己丑子死事滑縣知縣强克捷教諭
呂秉鈞巡檢劉斌等世職四月乙亥上閱健銳營兵像親王裕豐失察屬人祝
現入教謀逆已發覺不入奏削爵以其弟裕興襲封以興肇爲漢軍都統壬午
漕運總督桂芳卒丙戌賜龍汝言等二百二十六人進士及第出身有差五月
癸亥以和寧爲熱河都統六月庚申朔日有食之庚辰以劉鑑之爲戶部尙書
初彭齡爲兵部尙書署江蘇巡撫八月甲子上御經筵辛未大學士威勤伯勒
保再乞致仕許之命食伯俸以托津爲大學士明亮協辦大學士戊寅上謁陵

甲申上還京九月乙未以景安爲戶部尙書冬十月乙丑以慶溥爲左都御史
己巳江西巡撫阮元以擒捕土匪加太子少保十一月癸丑命開墾伊犁吉林
荒地十二月癸未百齡罷協辦大學士以章煦爲協辦大學士乙酉給祭太廟
是歲免直隸二縣河南二縣黑龍江各城災賦除奉天岫岩浙江西安四縣廢
田田賦朝鮮琉球入貢

二十年乙亥春正月甲午時享太廟命智親王行禮二月己未上御經筵三月
庚寅上謁東陵戊申上還京甲午初彭齡以參劾百齡不實又代茅豫乞病降
官旋經百齡查覆參奏奪職己酉兩廣總督蔣攸銑疏陳查禁鴉片烟章程得
旨洋船到澳門時按船查驗杜絕來源官吏賣放及民人私販者分別治罪夏
四月己巳上閱健銳營兵壬午上製官箴二十六章宣示臣工五月丁亥刑部
疏審明知府王樹勳即僧明心朦混捐保職官得旨枷號兩個月遣戍黑龍江
入教侍郎蔣予蒲褫職六月戊辰上製勤政愛民諭宣示中外己卯常明奏中
瞻對土番洛布七力滋事改委總兵羅思舉由下瞻對前往勦辦其勦辦不力

之總兵羅聲皋及提稟之都司圖棠阿均褫職逮問秋七月甲午總兵羅思舉
勦辦瞻對土番洛布七力竣事下部議叙癸卯上巡幸木蘭八月戊辰上行圍
百齡以捕獲編造逆詞首犯方榮升功管三等男九月己亥上還京冬十月庚
申召松筠來京以長齡爲伊犁將軍癸亥命侍郎那彥寶往勘山西地震災十
一月丁亥禮親王昭槤以刑比佃丁欠租削爵圈禁以麟趾襲十二月己卯祫
祭太廟是歲免直隸寧晉二縣災賦除江蘇寶山靖江山西靜樂廢田田賦會
計天下民數三萬二千六百五十七萬四千八百九十五名口存倉穀數三千
八十萬二千八百六十九石九斗一升七合五勺朝鮮琉球暹羅入貢

二十一年丙子春正月丙戌特詔諸親王郡王勿令內監代爲奏事致開交結
之端二月壬子上御經筵甲戌上謁東陵庚辰上還京三月庚寅上謁西陵辛
丑上臨故大學士朱珪墓賜奠丁未上還宮夏四月丙子張師誠以父疾具奏
不候旨即回籍罷以胡克家爲江蘇巡撫五月辛卯以馬慧裕爲左都御史孫
玉庭爲湖廣總督丁未以鄂勒哲依圖爲御前大臣六月丁丑休致大學士慶

桂卒戊寅那彥成緣事褫職逮問以方受時爲直隸總督閏六月戊戌釋昭槿於禁所壬寅以戴均元爲吏部尙書秋七月乙卯和世泰穆克登額蘇楞額以帶領英吉利國使臣不諳事體不克入覲俱黜降以松筠爲滿洲都統和寧爲工部尙書乙丑上巡幸木蘭八月壬辰上行圍九月戊午上迴鑾閱古北口兵壬戌上還京冬十月戊子命松筠署兩江總督章煦爲軍機大臣十一月壬子百齡卒調孫玉庭爲兩江總督阮元爲湖廣總督丙辰以綿志爲領侍衛內大臣十二月癸卯祫祭太廟是歲免直隸河南浙江湖南等省五十六州縣災賦有差朝鮮琉球英吉利入貢

二十二年己卯春正月壬申上御經筵二月丁丑釋奠先師孔子癸未以長齡爲陝甘總督晉昌爲伊犁將軍富俊爲盛京將軍三月甲辰朔以董教增爲閩浙總督戊申增設天津水師營總兵官專轄水師兩營壬子上謁東陵己巳上還京辛未章煦免以戴均元協辦大學士盧蔭溥爲兵部尙書汪廷珍爲左都御史夏四月丁亥上閱健銳營兵庚寅停伊犁仲夏進馬辛卯雲南夷匪平加

伯麟太子少保戊戌賜吳其濬等二百五十五人進士及第出身有差五月辛酉上祈雨壬戌雨以玉麟爲駐藏大臣丁卯福建布政使李庚芸被誣自縊遣熙昌王引之鞫其事得實奉旨總督汪志伊巡撫王紹蘭俱奪職壬申上製望雨省愆說六月甲戌松筠疏請停止明年奉謁祖陵奉旨嚴斥罷大學士黜爲察哈爾都統以明亮爲大學士伯麟協辦大學士和寧爲兵部尙書以賽沖阿爲御前大臣德寧阿爲成都將軍秋七月庚申上巡幸木蘭以蘇楞額爲工部尙書和世泰爲理藩院尙書八月丁亥上行圍壬辰積拉堪罷以毓秀爲杭州將軍九月癸丑常明卒以蔣攸銍爲四川總督阮元爲兩廣總督慶保爲湖廣總督庚申上還京庚午上製諫臣論頒都察院冬十月辛未朔日有食之十一月乙丑以伊沖阿爲熱河都統十二月甲戌免雲南銅廠逋銀丁酉祫祭太廟是歲免直隸八縣黑龍江三城火賦除奉天承德直隸定州江蘇丹徒江陰江西豐城河南孟縣福建侯官等縣水沖河壓田賦朝鮮琉球越南入貢

二十三年戊寅春正月戊申特詔松筠勿沽名市惠以保桑榆甲寅詔明亮年

逾八旬宜節勞頤養勿庸常川入直並免帶領引見承旨二月庚午命戴均元
和寧爲軍機大臣大學士董誥致仕命食全俸庚辰上御經筵己丑上閱火器
營兵三月庚子上謁西陵庚戌以章煦爲大學士汪廷珍爲禮部尙書吳芳培
爲左都御史戊午上還京四月戊辰朔日有食之乙亥風霾丙子詔曰昨日酉
初三刻暴風自東南來塵霾四塞然燭始能辨色其象甚異朕心震懼惕思上
蒼示警之因稽諸洪範咎徵蒙恆風若之義皆朕蒞事不明用人不當之所致
也有言責者體朕遇災而懼之心剴切論列無有所隱即下民有冤抑者亦可
據事代爲直陳以副朕修德弭災之意給事中盧浙疏言風沙示警請禁員弁
貪功妄捕擾累平民得旨所奏甚是林清案內逸犯飭緝承緝員弁輒以他犯
塞責番役兵丁乘機肆虐誣陷索擄無所不至比到官審明業已皮骨僅存貨
產蕩盡甚有因而殞命者冤苦莫訴宜致斯災所有次要五十餘犯概令停緝
即祝現等六犯亦只交刑部存記獲日辦理嗣後捕役有犯前情該管官嚴刑
重懲以其家產付諸被誣之家庶可做惡習而安良懦己卯欽天監疏言謹按

天文正義天地四方昏濛若下塵兩名曰霾故曰天地霾君臣乖大旱又主米貴得旨初八日之事正與正義之象相同惟朕恪遵成憲日日召見臣工前席周諮似不致於乖離但此其迹也其實與朕同心望治有幾人哉不敢面諍退有後言貌合而情睽是即乖也其於同寮不爲君子之和而爲小人之同是亦乖也我君臣其交儆焉庚辰上祈雨戊子上再祈雨辛卯雨五月戊戌詔曰館臣呈進勅修明鑑於萬歷天啓載入先朝開創之事又加按語頌揚於體例均爲未合副總裁侍郎秀寧降爲侍衛新疆換班正總裁曹振鏞等各予薄罰另行纂輯六月壬申武涉沁河溢旋報合龍七月甲子上東巡啓鑒八月丁卯朔詔以取道民田免經過奉天承德四州縣額賦戊子頒行皇朝通禮壬午上祭北鎮辛卯謁永陵行大饗禮九月丙申朔謁福陵丁酉謁昭陵均行大饗禮詣寶冊前行禮上製再舉東巡慶成記臨奠克勤郡王岳託武勳王揚古利宏毅公額亦都直義公費英東墓加恩額亦都後裔五人費英東後裔一人庚子上詣天壇堂子行禮辛亥上廻鑾丁巳以富俊爲吉林將軍賽沖阿爲盛京將軍

冬十月庚午上駐蹕興隆寺辛未萬壽節行宮受賀癸酉上謁東陵丙子上還京辛巳予告大學士董誥卒上臨第賜奠十一月戊申以奕灝爲蒙古都統辛亥詔曰國家臨御年久宜加意於人心風俗而人心之正風俗之醇則繫於政教之得失其間消息甚微繫於國脉甚重未可視爲迂圖也天下事有萬殊理歸一是從嚴從寬必準諸理施行所及乃能大畏民志民志定民心正矣凡我君臣當以憂盛危明之心不爲苟且便安之計其於風俗之淳薄尤當時時體察潛移默化整綱飭紀正人心以正風俗堯工熙績莫重於斯期與內外臣工交勉之十二月戊辰上所雪戊子以八十六爲廣州將軍松筠爲禮部尙書以劉鑑之爲左都御史壬辰禋祭太廟是歲免順天直隸山東安徽甘肅雲南等省七十九州縣災賦有差朝鮮琉球入貢

二十四年己卯春正月甲午朔上六旬萬壽頒詔覃恩賜廷臣宴封皇三子綿愷爲惇親王皇四子綿忻爲瑞親王皇長孫奕緯爲貝勒晉封綿志奕紹等有差丁巳和寧免直軍機以待郎文孚爲軍機大臣二月甲子上御經筵三月己

亥上謁東陵壬子上幸南苑行圍己未上謁西陵夏四月甲子上還京庚辰上閱健銳營兵丙戌賜陳沆等二百二十四人進士及第出身有差戊子龍鳳陽九江兩關監督由巡道兼理己巳上祈雨庚寅以松筠爲內大臣閏四月己酉上詣天神壇祈雨是日雨五月乙酉成親王永琔以告祭禮愆罷職削俸歸第以英和和世泰俱爲滿洲都統六月癸卯調松筠爲工部尙書秋七月壬戌以鄭親王烏爾恭阿爲漢軍都統庚申上巡幸木蘭壬午永定河決命吳璥那彥寶勘築八月辛卯河南蘭陽北岸河溢予告大學士威勒伯勒保卒贈一等侯九月壬戌上還京癸酉罷松筠御前大臣爲盛京將軍冬十月乙未萬壽節上御太和殿受賀侍郎周系英因參劾湖南客民焚殺兼致私書革職並斥革其子舉人十一月乙巳晉封明亮三等侯十二月庚子吳邦慶以奏覆湖南客民焚殺案不實降官丙午董教增疏請洋船准販茶葉得旨斥駁丙辰祀祭太廟是歲免直隸浙江湖南等省三十九州縣衛災賦旗租有差除江蘇川沙廳寶山縣廢地田賦朝鮮琉球越南暹羅南掌入貢

二十五年庚辰春正月壬申詔優恤老臣明亮和寧等毋庸來園帶領引見二月己丑上御經筵癸卯章煦以疾致仕以戴均元爲大學士吳璥協辦大學士戊申上閱火器營兵乙卯慶郡王永璘有疾上臨視晉封親王三月甲子上謁東陵兵部遺失行印事聞明亮以次罰降有差乙丑上詣明成祖宣宗孝宗陵奠酒己巳慶親王永璘薨戊寅上還京臨故慶親王第賜奠命其子綿懃襲郡王夏四月甲午上詣八里莊慶僖親王殯所賜奠庚戌賜陳繼昌等二百四十六人進士及第出身有差六月癸卯禁王公私設諸達及買民女爲妾松筠黜爲驍騎校秋七月壬申上巡幸木蘭方受疇等疏呈嘉禾戊寅駐蹕避暑山莊己卯上不像櫛夕大漸宣詔立皇次子智親王爲皇太子日加戊上崩於行宮年六十有一八月乙巳奉移梓宮還京十月甲辰恭上尊諡曰受天興運敷化綏猷崇文經武孝恭勤儉端敏英哲睿皇帝廟號仁宗道光元年三月癸酉葬昌陵

論曰仁宗初逢訓政恭謹無違迨躬蒞萬幾鋤奸登善削平逋寇捕治海盜力

提要樞崇儉勤事關地移民皆爲治之大原也詔令數下諄切求言而吁咈之風未遽睹焉是可慨已